

Ibore Ainakini Erai Ekecokon

Tucson, Arizona, U.S.A.
64-1221

1 ...Aomit eong bala arai eong ekalimonokinan lo ayangainakini aojau. Ido komam asiomit, aomit eong-eong bala mam eong asubit noi bala ekalimonokinan kama ejaas icetunga. Ido mam eong abala da ebe arai eong ekalimonokinan, esubit bon eong bala amopiira najulakinio arai emunaar najokan. Konye apupi eong ebe kijaar eong Aisiraret naebunit kama ejai Edeke, ebe koiponeka, (eipone ediopet bon loapedoria eong aitolomun Ngin), atamit eong aijakin Ngin neejai akwap. Ido arai mam eong asalakini kede Aisiraret ngin, ekabilakanan ebobet kama ejai Edeke ido loesoswai kama ijaas yesi. Etunganan loelimuni ibore idiopet ido kiyuunite ice, erai esoswai. Ekoto duc oni einer amoononut naka otauonowok. Tetera nakengolarata itunga oni, karaida mam ecamanara kaoni, ikoto oni araut ikiliok ka angor nukai buses: tetera oni inera nuejaas otauonowok, ngin naerai abeit kotauonowok.

2 Okaru loatubor, arai ekaru eringa ekaru loatubor, abu eong ajaunos kede arereng naka einer aisiiraret naka Ikristayon...arai kitimoto, aisiiraret naka ebaga, kane ko Ramada. Ido eyuunit eong ebe abu eong ener kotoma akou naka akirot, kane arai mam ko Phoenix, nuekamunitos: Kanukiinyo Araar Betelekem Lodidi? Ido eyuunit do eong ebe arai ne, nges abu eong enerar nuikamunitos: Kipou Kaanyutu Aaceritike Kokide Ido Kiponit Aima Nges.

Ido ijeni ijo, kisiomi oni Ebaibuli, ido iumokinit oni aingiseta ngun ebe, "Kanukiinyo?" Ido atibong na abu eong aoomomote, arai kititingikisi yesi eong ipak edit, kosodete ailip keong, ti eong atam ainakin yes aisiraret naka ebaga. Edeke bon ejeni aiboisit naibunio oni ajaun kobaga loetupakini, arai ejai ebaga loetupakini akaulo naka lo. Aso kwape eraar ebe epedori lo korai ebaga lokawasia oni aibo nepepe, kiton nakiboikinor oni omesa ece. Ido mam Ngol ebuni araun kwape kalo, konye ebuni araun loibunio oni ainyam ka aimat aimor naitet kede Nges, kotoma Akabakanut naka Papa kangeset naka erot. Kosodi do, adolokisi ngin atibong na kosubite bala erai na aisiraret nakawasia naka ebaga naibunio oni aibo nepepe, kotoma aidules naka ituaon.

3 Akoto eong einer atibong na kotoma akou naka akirot naitegelikina, icesawan idumuni ijo Edeke kotoma obore yenitegelel. Iswamai Ngesi iboro koipone loitegelel, apakio nuitegelelas, ojautesio luitegelelas, erai Ngesi loitegelel. Ido akoto eong na...kitojok Ejakait, akoto eong einer kotoma akou naka Akirot naka: Ibore Ainakini Erai Ekecokion.

Ido kwana eroko oni idolokina Akirot, naeyuunit eong ebe erai Edeke, "Kageunet kojai Akirot, kojai Akirot mama ejai Edeke, korai Akirot Edeke. Ido koraun Akirot akuan kiboiorori kakidingotowok."

4 Kwape abu eong alimunitor, osabiiti loatubor, arai esabiiti eroko loatubor ko Phoenix, "Itogogongotai ebe ejaas iboro luka akwap kana, itunga, etubonoros kotoma aduketait kana kwana." Kitogogongit etelevisio ngun. Erai kotoma adoketait ace, akonyewok nuka akuan ka apupetawok akany mam epedorete aanyun ngun. Mam erai etelevisio ngol iswamai idiobore, itoduni bon ngesi aitodun. Mam ijo ipedori aijangijang ebokoritikon, mam ijo ipedori airwakakin akonikongu, konye kitogogongotai ebe edaunitai aimar ngun ikar kere. Apedori eong abwoi...Araibo etunganan ko Australia, epedori kojaatar a-alabiro naka etelevisio ne, mere ngun bon konye epedori etunganan einer, ajangijang ekebokorit, airwakanakin akekongu, arai kiton eriagi da loka egoe loenapit ngesi, epedorio aitodun kane kotoma arwatat; ido kojai ngesi Africa, anatar akwap. Itei ijo, ejai airimirim naka ikwamin kangul. Mam eong apedori aitetemun, konye ejeni eong ebe ejai. Mam eong aomit bala epedori idiotunganan aitetemun. Aso, epedori etelevisio airiun na toma kosodi aitaraun ngin ibore yenabeit kanuka acuman ace, ebe epedorete aitodiar ngin kotoma arwatat ace.

5 Kwana, ajai ibore ngipengin ne neajaar Adam ne. Ajai etelevisio ne apak-apak naeboio Eliya kokuju Moru Karamel. Ajai apak naka Luther, esasedoti ngol lodidi, abu kocakak emugati loebelio kwap kosodi atemar, "Erai inyamati! Ido ejari ikadoliton kanuka aiyuun." Ajai kolo, konye ijai do oni ajenun kwana ajenun. Ido erai kwangin, ebe ejai Edeke akonyewok atibong na, Imalaikan, iboro lukotoma akuj lumam etakanete kama ejaas akonyewok nuka akuan. Konye kapak adiopet epote araun ibore ilopet kwape eraar etelevisio kwana, ido kidila tai. Kwana, ngin nges apolou eyuunitor eong Akirot.

Abala Yesu ebe, "Idiotunganan yenyatakini akirot adiopet toma Obaibuli lo, arai alemar Akirot adiopet awai naka Ngol, elemario aketutubet kotoma Oitabo loka Aijar."

6 Aso, ketulurwoto awokokwes kwap do, eroko ber oni esioma Ngin da. Erai namunot noi! Idiotunganan yenejaatar agogong naka akuan epedori apukor apapula, konye Edeke bon nges epedori apukor Ngin.

Ido kede akwesiwok kitulurite kwap asesen apua nakilemunere, ido kapak ace ibongori, mam eong ajeni...Ido kotoma osawa kalo lokapolon, kwape kijaar oni adolokin ebaga, erai ejaas ice ne luepupete ebe mam kes cut abeit ibusakinit ido kipudas aiatunio kotoma ailip kana, ijo (komam ikeunit akonikou) ikeu akonikanin neejai Edeke kosodi atemar, "Kiitunoi eong, Ejakait, kobaga kalo"? Kisirereng Edeke ijo.

7 Lokalaunan noi ido Papa Lokasianut lokotoma Akuj, Edeke Lokapedor kere, Ngol loajai kageunet, eroko aacerit ajauna, araibo ibore yenididi yenyaritai atom, arai molecule. Ibu Ijo kiswama iboro kere

kanuka Yesu Kristo Okokukon, ido ainaki isio iboro kere titai kotomaKe. Kisiyalamikit isio Ijo, atibong na, Ejakait, kanuka arereng kana nainak Ijo isio atukokin nepepe, kanu adumun aikwenyario kama ejai Emoyo Lokalaunan. Ido elemuni Emoyo Lokalaunan Akonikiro kosodi apukokin Ngun mamakosi, naarai abala Yesu, "Kebu Ngol Emoyo loka Abeit, kisiituni yes akiro nu kere nualimok yes kitodikini da yes nueponitos."

Edeke emamei idiopet da kakidingotokosi, emamei idiopet karaida kotoma akwap, yenibusakinit aitam aijul Akirotokon, naarai iwadikatai ebe, "Mam Akirot naka Edeke erai naepedori itunganan aijul kanuke bon." Kanuka ngun, Ejakait, ilipi isio ebe einakini Emoyo Lokalaunan atibong na, nginidiopet, atutubet naipuda isio kanu aisimonikin etengei loejai otuonokosi kanu alosit kodie kede Ijo. Mam isio ibecokina, mam ilai, mam ibusakinit. Ikoku yenaurunio ko Betelekem, yenabu kajar ajar naetekooro kakere, ido arai Ngesi bon arai etunganan loetekooro kakere kotoma akwap, kosodi ainakin Akejar asubanit tetere Ngesi italauni isio ikadiakanarak lumam ilai kosodi ayangaun isio toma oidicane kede Papa, koinakinai atibong na ebe ebuni Emoyoke Lokalaunan (kotoma alimonokinio naka Akirot) aswam ngun kanukosi.

8 Ejakait Edeke, ejaas ikadekak luipu toma akwap lolo, kakonyen nuka ikee lukajokak kakere luaponi kimukere isio kede ka adekesia nukajokak kakere. Ido kereka kotoma angicununetakosi nukapolok nuka science, konye kojai adek naepol noi adepar naejenunitor akwap ageun, naarai ejai adiakar naiyatakina ka amamus aiyuun naepol adepar naejenunitor akwap ageunkolo. Kingarakinai isio atibong na, Emuron Lokapolon, kosodi aitangal lukadekak luejaas akidingotokosi.

Ido koinakinai isio Emoyo, Emoyo lokabeit loka ebaga. Neejaatar lolo...ebe neejaatar ipucinio luka ikapiirin, amaio naka ikito luka ebaga, awaragasia nuemamei apetetait nuka e-etunganan loenyaritai Santa Claus, ka nuka ipooikosi luka Epasika, ka ipetenesio luetopolo akwap naka aisubis, kolemani ngul kere awai, Edeke. Alomasi isio toma Kristo Akirot, naarai ilipi isio Kokirorike ido kanuka aibusesuKe. Amen.

9 Arai ipedorete yesi apukor kede eong asiometait kotoma Aiwadikaet Nakalaunan, Luka Lokalaunan, esula lo 2. Ipupete yesi eong ejok?

Biai ejai aijulakinet adio toma acuma naineris? Yesi ipupete eong kokau ejok? Arai ipupi ijo ikeu akonikan kaju. Eyalama. Esula lo 2 loka Eijiri kwape ejaar kama ejai Luka.

Kosodi kanen kapaarasia kangun, kobu ekisil kama ka Kaisar Augustito ebe ibusakinit itunga luka akwapin kere aiwadikao.

Ngin nges aiwadikao nasodit nakeraar Kuirinio ekayaiton loka Suria.

Koloto itunga kere aiwadikao, nginitunganan bukec.

Konyou Yosep da koGalilaya, kore Nasaret, kodoka alosit Yudaya, ore loka Daudi, loenyaritai Betelekem, naarai kerai ngesi lokokek ka ajena naka Daudi:

Tetere iwadikao nepepe ka Mariam, nakisinerit ngesi eptiei.

Kosodi kanen, ejaas ngina, kodoloto akepaarasia nuka aidoun.

Kidou yenikiyaike yenisapat; kimuko kigoen lukimukeru kiperik atuba nakenyamenenata ibaren, naarai mam edumunito apak kotogo loka ipejok.

Kojaas ikecokok kakwap kangin kiboiete kais idarete ekecesipan kuare.

Kotakanik kes emalaika loka Ejakait, kocau angosibibi naka Ejakait airiamar kes: kokuriakaros noi.

Kotema emalaika kes atiar, "Sirikuriakaros: naarai koany, kainunit yes akiro nukajokak nuka aiyalama naepol naejaun mama ejaas itunga kere.

Naarai auruun lolo kanukus Eketajaran, nges Kristo Ejakait kotoma ore loka Daudi.

Na nges aanyunet kamakus, idumunete Ikoku yenimukeru imukoritai kigoen lukimukeru, eperi kotoma atuba nakenyamenenata ibaren."

Katipet kojai nepepe kemalaika ngol ekodet loka ajore naka akuj ituritos Edeke, ebalasi ebe,

Kojai aibuses mama ejai Edeke kokuju kaku, kainapakin da kakwapin mama ejaas itunga luitojokit."

Kosodi kanen kenyout imalaikan abongor toma akuj, kotemanaros ikecokok ebe, "Aso kalototo kiton Betelekem, kaanyut ngun nuiswamatai, nukitejenu Ejakait oni."

Kolototo katipet, kodumutu Mariam ka Yosep, nepepe kimukeru eperi katuba nakenyamenenata ibaren.

Keanyutu, kitejenut akirot nakelimokinio kes naka ikoku kangin.

Koumokis lukiirarete kere akiro nukelimokinete ikecokok.

Konye koricite Mariam akiro ngun kere, koomite kotauke.

Kobongosi ikecokok, itopoloorito ituritos da Edeke kanuka akiro nukiirarete, muaanyut da, kwape kelimokinitere.

Kisirereng Ejakait asiomio naka Akekirot.

10 Kwana, erai e...Inyobo ainakini epukokinio akirosit na nakapolon neejaas ikecokok? Ti ngin erai ibore yenesubit bala epol noi kanuwok. Kijaar eong ikokoron idis iwadikatai ne, ka akiro adis nuabuni eong aitam aitor toma, kanu aitetemikin yes kanukiinyo koipone kalo ajenia eong kere. Kosodi do aticepak akaulo naka nu, ebe ebuni Ejakait kede Akesianut, atibong na, alemar awai aingiseta nu ebe kanukiinyo kamawok. Konye abu...Noi noi oni kere, aomit eong, kotoma apak adiopet arai ace, aomokinit kanukiinyo araar ebe akirosit na nakapolon naka apakio kere aponi kopukokinai neejaas ikecokok. Inyobo ainakini Ngin epukokinio neejaas ikecokok ido mere luesisiatos akiro nuka ediini luka apak kangin? Arai ngul kes etutuoritai apupun Ngin. Ido inyobo ainakini Ngin ebuni kosodi ainac lukabarak, kosodi abunore neejaas lukican? Bobo da, inyobo ainakini Ngin inaci luesisiatos ka lukacoa, kosodi abunore neejaas lueyapaara ido komam isisiatos? Ejaas aingiseta adis nuka kanukiinyo kotoma kanu.

11 Ido ibore idiopet yenaticepak epedoria eong alimun, koany, aponi kourunai ikoku ko Betelekem. Naeraar Betelekem kotoma aijulunet naka Iburanian, kwape kipou oni aanyunitotor ikar idis kau kane, Betelekem akepolou ebe, "etogo loka emugati loka Edeke." Ido apotu oni etogogongoto kotoma Nuiwadikaere, mam Nges apedori abunore kotoma aiboisit adio kere. Rakab ka okilenike kes apwakunete Betelekem. Arai Rakab amalayat nabu ekapolokiniton ajore isupa, kotoma ajore naka Isirael, akaulo naka kes aikamar Yeriko. Ido kanuka aiyuun abu kocam Aisiraret naka Edeke, kotoma ojauteneke, ido aponi nges kitajarai. Ido anyoun kanen, neabu Yosua kotiakatiaka akwap neabuni nginidiopet ajaun,...

12 Ido ejai akirot nasisiauna naepol noi na amuno eong acepak ayangaun ko Tucson, naka nukatoto ngun nuka Iburanian aur idwe ngun. Nakemonyia kotoma ariebo naka aidoun ikoku, eworoori ngesi ekiror loka ikoku ido ngol nges asipokini ikoku ngin aiboisit kotoma akwap naka aisumunet, atekerike. Ibore yenapolon, Akirot naak Edeke kere eupa cut nepepe. Arai mam eupa nepepe, mam erai Akirot naka Edeke engolopa, erai aomisiokon kes einakisi Akirot naka Edeke angolopikin. Eupa Ngin kere nepepe.

13 Aso, do, arai Ngesi Emugati loka Aijar, kwape kipou kesisianakiniata kosabiiti loatubor ko Phoenix, arai bo esabiiti eroko loatubor. Ido kwape araar Emugati loka Aijar, mam Nges apedori abunore kotoma aiboisit adio kere kidimarai "otogo loka emugati loka Edeke." Ido ngin nges arai abongokinet naka aingiset ebe kanukiinyo. Kwana, kane, euruunitai Yesu ko Betelekem, ido ko Betelekem kangina ajai atukos, ingarenok lukapolok luka ediini eboiete ko Betelekem, Daudi ekabaka lokapolon loarai ekecokion auruunitai ko Betelekem, papake Yese aurikinitai Betelekem, papaake Obed aurikinitai Betelekem. Bobo, da, abongor kau kere, alomunito ko Betelekem.

Ido kane, Yesu Okoku loka Daudi eurikinitai Betelekem, cut kokwap naka itoribei luka aicokisio nukapolok. Ido arai itutuoritai itunga ngul, ido kojaas lem amoot Mesia adaun ikar lu kere; ikar akwataongon, adwaritai Mesia abunore. Ido arai ebeit Mesia auruunio kotoribe loka aicokis, inyobo do bobo ainakini kes abongor kau kuju toma omor neejai atukos naka itunga lumam isisiatos, ikecokok lumam itutuoritai kanu ayangaun Aisiraret nakapolon, Aisiraret nasodit? Kosodi aiyakiar ikecokok! Mere lukacoa ka luetutuoritai, konye ikecokok. Erai ibore yenitegelikina, biai mam? Konye ebeit kojai aingiset kanenice ebe kanukiinyo...Ejai aingiset ebe kanukiinyo, kwana ebeit kojai abongokinet neejai aingiset ngin ebe kanukiinyo! Ido emamei itunganan yenejeni abongokinet kidimarai Edeke. Ngesi ejeni abongokinet.

14 Kwana, kiitu, adaunit Mesia ajaun ore, aurunitai kore, kotoma awi; cut kosiep naka aicokis neajai esasedoti lopeti...ka esasedoti lokapolon, ka luisisiatos akiro nuka ediini, ka lukacoa, ka luitutuoritai, kere ajaas aidarit Mesia. Ido ajai Ngesi nen, cut kakidingotokec! Konye inyobo do ainakini kes elosete neejai...ngina orongan luko Yuda neejaas lumam esisiatos, lumam etutuoritai, lumam ejenete einono, lukiican kakere? Asubit bala itunganan yenimam ebusakinit kakere kanuka epelu kangol, kanu apukor Aisiraret kosodi aijukar kes kinga kanu ayangaun Aisiraret.

Ijenete yesi akaomisiolit? Mam aticepak epedori araut naepol ajokis noi, konye akoto eong akorar akaomisiolit: eyuunit eong ebe erai kanu naarai acoa naka Edeke, ebe ajeni Ngesi ebe mam ti ngul ijautu eipone Aisiraret kwape kwangin koipone lokebunio. Mam ebecokina kede aisisiakec. Etegelikina. Mam arai ngol eipone loetutuoritere kes aiyuun ebe abuni Ngesi aputor. Angolopasi kede amisiikinikec naka aisisia naka ediini. Aitutuoriokec kere, aisisiakec kere aponi kinacai, abu koraun tai. Acamunit eong ebe arai acoa naka Edeke nges ajeni ebe mam ti ngul ijautu Aisiraret kwape kangin.

15 Aso ajai Mesaia ne, ido ebusakinit kojai itunganan yenemisiikini Ngin. Ido ajeni Ngesi ngul lumam enyalinyaluna kotoma oboro luka eipone kwape kangol. Abuni Ngesi apedor noi ayangar Aisirareteke

neejai atukos naka lumam esisiatos, adepar kwape ti kepedoria neejai atukos nainyalinyaluna nasipokina noi toma orotiniyec ebe amamei ibore yenapedori aibelokin kes, mere karaida Akirot naka Edeke.

Ido kwana, ipapero lukristayon, ber eong engit aingiset na, kede ekatau kere ka amin. Mam eong ajeni arai epedori Ngesi aiswamaun aswamasioit ngipengin atibong na, kosodi aijukakin oni kotoma atur kana Akirot naisumunitai naisumunitai kanuka atur kana, mam eong ajeni arai mam luisisiatos akiro nuka ediini, ka luesiomitos, ka lukacoa, epote ainger Aisiraret kwape apotu ngul kiswamatar kolo? Mam etunganan ijulakin, karaida Akirot naka Edeke mam ijulanakin. Erai Ngesi Edeke lomam ijulanakin, mam Nges ijulanakin!

16 Koany, Imalaikan abunore kosodete...Imalaikan abunore kosodete ainakin Aisiiraret neejai etunganan loka adoketai nakokwap kwape kangin, kojaas itunga luapedoritos noi (kotoma aomoom naka akwap) elosikina noi adepar itunga lu lukican, ikecokok lumam esisiatos. Ekecokon nges erai etunganan lomam ibore yenajeni adepar idiotunganan kere, mam nges epuda aijen idiobore kidimarai bon nuikamunitos amerekekin. Mam nges epuda asioman adio, mam epuda nges aijen aimar adio. Mam nges epuda aijen eipone loka aitiak ibore yenididi noi yenenyarita atom. Mam nges epuda adiosiman. Akoto bon nges aijen amerekekinike, ngun bon kes nupuda nges kojoni. Kosodi Edeke, Acoa nakapolon, ka Atapar ka alibunet naka acoa kere, asekun etunganan loka epitene kwape kangol (itunga, atemas, kwape kangul), kosodi ainac itunga kere luasiomitos luetutuoritari ejok luetutuoritari kotoma aswam naebucara. Ainac kere lukapolok luka akwap; ajaas itunga lukapolok, ikesisianakinak lukapolok, Kaiapa esasedoti lopeti, itunga ice luipu lukapolok, kere itunga luka Isirael luesisiatos noi, idiinin kere, ka luapogasi luesisiatos akiro nuka ediini, abu Edeke inac nginidiopet kakesi! Kwana, ngin nges acoa naka Edeke.

17 Koany, Akuj Naikiara kakere isuburikit aitubusikin luka akwap luetidisiara kakere. Abu Lokapolon lokatoma Akuj kijesun kwap kanu aitejenikin neejaas luetidisiara kakere lukotoma akwap, aikalam kere luajaas kiding kanu aitejenikin neejaas ikecokok; abunore ainakin ikecokok lu lutai Aisiraret naka apakio kere. Ajauna ikiyakia luipu lukapolok. Ipedori ti oni aomoom nuka apak naka Noa, ka inabin, ka-ka isadotin lukapolon, kaiceda, arai kotoma apaarasia nuatuboros. Itunga lukapolok luesisiatos, ikabakan, ikayaitok, akayaitok akabakanuto, konye kane kobuni Ngesi kede nakapolon kakere kotoma Aisirareta. Arai bo Aisiraret biai? "Ejai Mesia ne kwana!" Ianyu? Kosodi kanu aitejenun ngun, abu Ngesi kinac ngul kere, kanu aitejenikin ngin neejaas ikecokok luetidisiara.

Komoom ber ijo ngun: kere itunga lukapolok kokanisa, kotoma otunga kere luka okanisa, ikesisianakinak kere, kotoma aituutorio kere naka akiro nuka idiini, isirigin kere luaponi kitwasamatete, ikanisan kere, ka aisisianakineta kere, ka idiinin, kere aponi ikalamai! Aisia kere napotu kesi kiswamatos neejaas ikiyakia kere, ka aibelonokin anyoun aiyuun adiopet kiton neejai nace, araut imeeban ngin kere, ka nginibore kere yenawomitotor kesi ebe eswamaikinitos kesi Edeke aibuses, konye kere Aisiraret naka ngin kere aponi kinacere kere. Itegelikina! Inyobo? Ianyu?

18 Ido koany, mere ngun bon, konye aiboisit namam ebusakinit kakere kanuka akirosit kangin. Ikecokok, kwana, kes apotu ijautu Aisiraret. Ido kwana koany neajai Aisiraret: toma aiboisit namam ebusakinit kakere namam idiotunganan aomit bala ti Ngin elomu kotoma. Mam eong ajeni atibong na, korai ti oni amootos Aisiraret nakabeit naka Ejakait Yesu, mam eong ajeni arai ti eraun atukos namam ibusakinit, aiboisit naerai... ebe akwap nakapolon, naka adoketai naekiara ka ekanisa lolo ti eomoom ebe arai atukos naka-naka, oo, luka ikerep? Mam eong ajeni arai mam ti ngin eraun aiboisit naidumakini oni Nges? Aiboisit namam ebusakinit kakere, ka ikenerak lumam ibecokina kakere. Mam ikecokok ejenete idiobore yenikamunit einer, aiworot amerekekin bon; eebo, aticepak ngin nges apolou ainakini Ngin ebuni.

19 Konye arai ngin Akirot naesumunitai. Koany, abuni aswam ngun bobo.

Abu inac itunga lukajokak kere luka akwap. Abu ilam itunga lukajokak kere, kosodete apukokin itunga lutai. Itunga ngul kere lukajokak luesiritai kede-kede asioma naikiara noi naka ediini ka-ka acoa naka adam, ka iboro, aponi ngun kere kinacai kosodete apukokin itunga lutai. Acoa, acoa naemamei ageunet arai esange naka Edeke lokapedor kere nges abu iswama ngun, aitejenikin ngul Aisiraret nakapolon kakere najaunor, "Ejai Mesia kwana toma akwap." Ikoni bo lolo acoa ngin ai! Apedori bon abunore kama ejai Edeke loejeni acoa! Acoa kere ka asioman kere, ka nginibore kere, aponi kere kojalakina icanicanuna ido kojalitete acoa nakapolon naka Edeke. Enyikokinit eong ainyoginyog ngun naarai akoto eong ngin koloma toma noi. Kere aperete kicanicanuna, amamei ajokis. Abu inac ngun kere kanu ainakin acoa naka arereng naka atubor, ebe eleumi Edeke iboro lutai kanu aiswamauna iboro luepon ajokis.

20 Ipedori ber ti oni abwoun kane kasodete einer nuka Yokana. Ti ber oni ibwou kasodete einer nuka Eliya. Amamei itunganan yenejeni nealomunitor Eliya. Kere nuejenete kesi, abu bon ngesi kotakan. Inabin kokau kangina kotoma aturio, araas itunga lutai. Konye abu Edeke kolek ngun kanu...kosodi aikalam iponesio luka ekanisa, ka aisisianakineta, kanu ainakin...aitodun ebe erai Ngesi Edeke. Elemuni Ngesi icebore yenerai tai, kanu aiswamauna icebore kede ngin. Itoduni Ngesi Akecoa ka Edekeoneke koipone loka aswam ngun, ebe elemuni Ngesi iboro lutai. Neeswamauna Ngesi etunganan irwan nasodit, abu bon kolek alunguret naka elupe kosodi aiswamaun etunganan kotoma ngin. Neemam araar idiobore kidimarai

elupe, konye abu kosub etunganan. Ido elemuni Edeke iboro lutai kwana, kanu aiswamaunia icebore kede ngul. Ido anyoun naiwomitor oni ebe irai oni icebore, akepolou mam do oni kipedorio aitwasam kotoma akanin nuka Edeke. Ibusakinit oni aijal kere nuijenunitor oni arai nuisisiaunit oni. [Igesari Onac Branham ekeporoto-Ekewa.] (Kitimoi.) Kwape Paul lokapolon Lokalaunan, ebala ebe abu koyangaik nges aimurwokin kere nuesisiat ngesi, tetere ejenuni Kristo.

21 Asiomanikec kere, aisisianakinetakec kere kaceda, eswamaete kere kanuka nukarokok kanukec. Awasiake abu onger Nges! Asioman ngipengin napotu kesi kojaatar kanuKeng, kanu aiyuun Nges, abu kibelokin kosodi arau n lokasuropuKe lokaronon kakere, kosodi aibubukin Nges!

Ijenete yesi ebe akiro nukolo sek inyogonokinete aiswamaunun abongobong? Erai abeit cut naejena. Epedori aiswamaun bobo cut kosiepiwok. "Oo," ibala ijo ebe, "Korai eong ajai kolo,..." Eebo, kokesen ejautenekon loka lolo kwana; ido ipedori ijo aanyun nutikiswama ijo kolo, naarai ebeit cut ejai apukor.

22 Etutuoritari aiyuun Akekirot, ido apak neapukorere Akekirot kakonyenekec, apotu kongereto Akirot naponi kitodiarai. Neabu Edeke kitogogongooro nuabuni Ngesi aswam, kosodi alimun nuabuni Ngesi aswam, kosodi aitogogong nuabuni Ngesi aswam, aso apotu kesi kibelokinos kosodete anyara etunganan lo ebe, "emoyo lokaronon" (abu do ngin iken kes kere). Koomoom ber ijo nuapotu kiswamaunos! Koomoom beri ijo ibore yenabu iken kes; atutuoriokec nges abu iken kes mam amisiikin Akirot obeeraun akuan kanuka apakikec; aitutorio alopet napotu kesi kojaatar kosomeronoce, kede ikesisianakinak luajokuka kakere.

Ido ibala ijo ebe, "Eebo, mam ti isio iswama ngun lolo." Araas ikesisianakinakakec araas luapol adoketait noi adepar luwok lolo (luapol apedor, atemas, adepar ikesisianakinakawok), ido abu okurwok. Amameotor kesi iriongeta akwatakanykaongon ka akaisakanykaongon ka lukanykape luegelegela kwape kijaatar oni lolo. Ajaatar nepetai iuni. Ido kotoma ouni, aijesun kwap neejaas iuni, ido amamei ediopet kotoma ngul loabu komisiik Ngin! Elosi aitodun ebe nuiswamai etunganan erai abanganut kama ejai Edeke. Ianyu?

23 Kwana, abu okurwok amisiikin Ngin. Kwana...Ido epote aswam ibore ngipengin bobo.

Etunganan...Ejok alosikinet, ejok duc. Ido mam etunganan ijulanakini ekeipone, mam nges ijulanakini ikerotin noi; enera eong nuka etunganan loka akwapin. Iturit duc etunganan Edeke, etunganan loka ediini, kanuka nueswama Ngesi, kosodi aitalaun nuejai Ngesi aswam! Ianyu? Etunganan ngol ikoni nen, iswamatai nges koipone kangol, ekonenei duc ngesi nen. Ido yesi ikasiomak Ebaibuli atibong na ijenete ebe erai kwape ejaar kotoma Akirot, "eebo." Ituritos duc kesi Edeke kanuka nueswamat ngesi, kineras nuebuni Ngesi aswam, ido kitapalaunitos nuejai Ngesi aswam. Erai ngol einono loka etunganan.

24 Ibore yenainakini kes iswamaete nu, ikesisianakinak, kotoma aomisioitika kwana: apotu kijulunitos Akirot naka Edeke, naarai eyuunitos kesi abunore naka Mesia. Isirael kere eyuunit ngin, iswamaete kwape kwangin lolo da. Konye apolou nainakini kes mam emisiikinete Nges, mam Akesiraret abunit koriakasi kede aisisianakinikec. Ngul...aijulunetekec najaatar kesi naka Akirot, mam Mesia abu kitodiar koipone kalo ejulunitotor kesi ebe abuni Ngesi aswam ngun. Aso, ido kanuka ngun, mam apotu komisiikisi Nges naarai mam ebekokina kede aijulunetekec. Kwape alimunitor eong sek, ido alimuni bobo ebe, 'Mam Edeke ipuda idiotunganan aijula Akekirot. Ijuli Ngesi elopet.'

25 Kwana, ebala Ebaibuli...Ber eong etogogongoik yes kwane ebe erai ngin Abeit. Isaia enabi, ikar akwatakanykaarei ka itomon kalukany eroko nu iswamauna, abu Isaia enabi kolimunit ebe, "Epotuni abekot, ido euruuni ikoku." Emamei abuonokin ebe nginitunganan kotoma atur kangin aomit ebe akokuke nges abuni araun aberu ngin, naarai alimunit Isaia ngin. Konye, itei ijo, arai ikar akwatakanykaarei ekaulo. Konye...Mam Edeke epuda idiotunganan aijul Akekirot, apak nabunio Ngesi aswam ngin, araibo eipone loabunio Ngesi aswam ngin. Alimunit Ngesi ebe abuni aswam, ido abu kiswama.

26 Esumunikit Edeke ebe...kalaije kotoma Isaia, bobo, acamunit eong ebe esula 28, nepetai ekokoro lo 18. Kosodi bobo kotoma Yoel 2:28, ebe kotoma apaarasia nukawasia, ikar ilukumin iarei lukawasia, abuni abukokin Ekemoyo neejaas awat kere. Abala ebe, "Edwarete ikusidwe lusap ka lupesur. Esesenete atumunakakus aitapoeta. Irujaete ikusimakio airujasia." Ka iboro luabuni Ngesi aswam, abala Isaia ebe, "Kaituke numo, ka angajep ace elimokini Edeke itunga lu, ido na nges Aibworaret." Konye mam apedorete apupokin Ngin. Apotu kitulurwoto akecekwes kosodete atubor kama ejai Ngin. Ebala Ngesi ebe imeesan kere luka Edeke apote ailelebun kede alekan, ido abuni amameun ibore yenelai." Ido arai mam ngin erai aput nako Yerusalem, ka ekanisa loka apak kangin kotoma apak naka abunore naka Mesia, erai aput ngipengin lolo, ajai ainyogokin bobo.

Kwana, elimu Edeke ebe ebuni aswam ibore, iswamai Ngesi. Mamace nuebala idiotunganan, elimu Edeke ibore, ikamunitos Nges akiro aijul Akirot ngin Nges elopet. Ido aitodiareteKe naka Akirot nges erai aijuluneteKe. Koany, aitodiar Aisirareteke naka Mesia. Esumunikit Ngesi nuabuni Mesia aswam kebu. Ido nakebunio...

27 Karaida neapotu itunga lukacoa lukokide kongoliarata kwap ewai loka angalakimak, anyoun kama ajaas kesi ko Babulon, kosodete kesi aanyun aacerit na nakapolon. Ijeni ijo ebe emamei karaida alimakinet kotoma akiro nukolo, kanenidio, neabu eketeon edio (nearicitotor kesi apak kitwasamaete aacer, itunga lukapolok luesisiaete aacer nu)...Emameete akiro nukolo nuebalas ebe aanyunitor idio kotoma kakesi aacerit cut. Inyobo? Mam ainakinitali kes, mam kes amootos ibore kwape kwangin. Konye itunga lu lukacoa ajenete ebe abuni ajaun Aacerit naka Yakob naelomuni, ido amootos kesi Ngin, ido abu kotubor anyoun kotoma apak naurunere Yesu ko Betelekem...

Kwana, ajeni eong einonowok loka Ekristayone, eputos bala ikanisanawok, ejaatar iboro luitolitoluna noi. Kilot ijokinga ne kosodi ijo aanyun itunganan lokacoa ebuni aima ikoku; emamei ibore kwape kangin kotoma Naiwadikaere. Ikar iarei ekaulo apotu kodoloto ngina, aponitos koukono ka aitor Ocilet lo Tigris. Mam aponitos aima imukeru, konye ikoku yenididi yenikar nepetai iareu lukapolou. Inyobo araar kwangin, kotoma apak ngipengin, abu Erode koyar idwe luka ikar iarei kwap? Tetere aticepak nges apedori aikamun Mesia. Itei ijo, ngul...abu Edeke kitodiarite kanuka Akirotoke.

28 Ido nakeponiata itunga lu lukacoa Yerusalem...Abu aicerit kingarenik kes neejai ere lokapolon loediinikit loka akwap, Yerusalem. Ido napekelomasi toma orutei ngul, abu aacerit (ibore yenikotoma akuj yenengarenikit kes) mam abu kocam aitodikin kes bobo. Apotu itunga lu lukajokak, luabaritos kirimokisi kuju ka kwap korotin kede asigirian nuemukoritari, kaceda...kuju ka kwap korotin kobalas ebe, "Aibo ejai Ngol loeurunitai Ekabaka loka Iyudayan. Kipou aanyut Aaaceritike kokide." Ido ere ngol lokapolon loka ediini, akaulo naka ikar iarei luka Aisiraret naka ikecokok, asalakinit emameotor abongokinet arai amamei ibore yenajeni kanuikamunitos Ngin. Ekapolokiniton loka idiinin kere amameotor abongokinet.

Aso abu itapas ikapolokinitok luka ediini, kosodete anyaraun Ikewadikak abunore aisiom. Kosodete aisiom awaragat naka Mika, enabi nabala ebe, "Ijo Betelekem, mam kereka ijo irai lodidi kokabakan kere luko Yuda (lodidi), konye kotomakon elomuni ekayaiton loipugai ikatunga, Isirael." Ido akaulo nadaunere aisiom Nuwadikaere (ido oroko esalakinit itodiara kakonyenekec), asalakinitos mam iyuunitos Ngin, karaida abu Nuiwadikaere kinerite ngun. Abuonokin eong noi noi arai ecamunete lolo, arai kitodolikinos Nuiwadikaere nuesumunikitari kanuka apak kana. Aticepak mam eong abuni alimonokin yes bobo, konye akoto eong yes aikamun nu. Ti mam iyuutu kwape kwangin!

Acoa nakapolon naka Papa itarauni acoa naka etunganan araun abanganut noi tetere Nges itidisiarit etunganan. Abeit cut edolokini Ngesi toma adoketait naeinakina Ngesi etunganan irumitos ileic kanuka akeijar, ido mam nges epol ejok kanu acamun ebe "ibucarit ngesi." Eroko ngesi esalakinit kede akewaragan, mamace eipone loitogogongoorio Papa ebe erai Akekirot abeit ido ebe ejai Ngesi aswam ngun nuesumunikit Ngesi aswam. Eomit etunganan ebe epol akecoa noi kama ejai Edeke, arai mam ebuni kwape ejaar akecoa, "Inyobo, mam erai kwangin." Erai ngin cut abeit kotoma nginitur, eroko ikoni nepenen. Kosesen ber ijo eipone loebecokinar akirosit ngin kere, kwana"

29 Ekoni bo lolo aisinyikokinet ngin ai neejaas ikecokok amerekekin ngul! Imalaikan aijesun kwap einer kede ikecokok amerekekin, Imalaikan luka Edeke epote ainerakin kede atukos naka ikecokok.

Mam eong ajeni arai ijaunatar ijo kede arereng naka einer kede ikecokok arai aupakin kede ediopet, ipak edit? Korai ijo kojaunar, mam eong-eong akoto alimun ngin kanuka alimuneteka naebait eong alimun akaulo naka apak naedit, konye ekecokon iboiete kede amerekekin noi noi kiton naekienar ngesi kwape amerekekin (aimony kwape amerekek), inera ngesi kwape amerekekin, ido eur kwape amerekekin. Edolit ngin, naarai ejai ngesi kede amerekekin. Kere nuejani ngesi kesi ngun, nges amerekekin.

30 Kwana, Akirot naitodiaritari naka Abeit. Neapotu ikecokok lu, itunga lumam esisiatos...Ikoni aitubusikinio ngin ai, eipone loibecokinar ekecokon aijaun aisiraret naka imerekek yenitetet yeneurunitai. Mam ti kebu neejai icebore kidimarai ekecokon. Ngin nges apolou aurikinere Nges awi, konye mere togo. Mam amerekekin eurinikinio toma togo, arai bo toma agoola naka adekis naeculitari. Ianyu? Eurikinio kes awi naka amerekekin, ka amisirin.

Ngin nges apolou ainakini Nges ingarenikinio kiton Kalvari. Mam ijo ipedori ainakin amerekek alosit korot loelosere toma atubio. Ijeni lem ijo ngun? Kotoma aiboisio nuetubutubere, ejaatar kesi akinei naingarenikini amerekek. Ido needolokina ngesi kuju neejai aiboisit naetubere, esomar kinga kosodi ajalakin amerekek alosit ngaren. Ejai amerekek aingarenikinio. Mam epedori aingarenikin akekuan. Aso, kanuka ngun, akoto korai ekecokon abuni kanu...amerekekike. Nakedumuniata ikoku yenarai Edeke cut becebec kotoma aiboisit nabala ekiyakia ebe abuni Ngesi ajaun, ido nakedumuniata kesi Aisiraret na naka ekiyakia kotoma atuba, cut becebec neabala ekiyakia ebe abuni ajaun.

31 Kwana, abu eong keira itunga ineras ebe, "Abu Emalaika kenerata keong, abala, 'nu ka nu.'" Eipone loeraar aitimosit icesawan; ido apupunitor eong itunga ineras ebe abu Emalaika kerakinos kakes kosodi alimokin kes "nu ka nu" naetegelikina cut kama ejai Akirot. Kwana, eipone ali kiswama Emalaika ngun? Mam apedori araun. Arai abu Edeke kolimok ijo ebe alosi icebore aismamaun (ibala ijo ebe kilimokinit ijo Edeke ngun), kosodi mam aismamaun, akepolou mam arai Edeke eneras kajo. Kiitu ngin, edolit ngin. Mam Edeke ingalai. Mam Nges edumunio kotoma aingal.

32 Nakedumuniata ngul Ikoku, eipone loabu ngin aticepak koraar aiyalama mamakec. Naarai Emalaika loayangauni aisiraret, apotu kodumutu cut becebec koipone kalo abalar Emalaika ebe abuni ajaun, ido kotoma aiboisit nabala Emalaika ebe abuni ajaun. Eipone ibore bo ali arai ngin mamakec!

Kotoma atuba, inyobo? Koany ber ijo eipone loapotu ikecokok lu kojaunotor toma awi? Inyobo iwomit ijo tikiswama etunganan loisisiat akiro nuka ediini kotoma kangina? Ti irupaki episo toma okumeke, kosodi atemar, "Koyangarai eong awai kama ejai aibosit na." Ianyu? Ti nges eraun loesilikinit, ti ngol ejaun toma aiturur.

Konye, itei ijo, arai, "kwape ore" kama ejaas ikecokok. Ejeni Edeke nebeit aijukar Akeisiraret. Ianyu? Cut becebec edolit. Kotoma ojautene kalo loaas ikecokok toma kapak kangin, kotoma awikec kede Imerekek, Aisiraret naetodiaritai napupunitos kesi. Eipone loibusiar! Kotoma akonyen nuka Mesia, Akirot naetodiaritai naka Aisiraretekec. Neapupunioto ikecokok ebe ajai Mesia toma akwap, kosodete abunore toma akonyeneKe, cut kotoma aiboisitikec, (kosodete adumun ebe arai Aisiraret abeit, etodiara kangina) eipone loetakani abu ngin koinakina itunga ngul aipup, kanu ajenun ebe abu Edeke kiswa ibore yen yenapolon kanukec.

33 Inyobo, ti luesisiatos esiliki kangina, kokwap naka ejautene kwape kangol, ti enyoutu katipet. Inyobo? Abunit ekiyakia neejaas ikecokok lutai. Aticepak mam ti ngul karaida...lu...ice kotoma ikecokok kalu aticapak mam apedoritos karaida aiwadik ikecekiroria, abunokin eong noi. Ijeni ijo ikecokok loabu Yesu koseu nejaar Ngesi ne toma akwap, kanu acok amerekekiniKe, "Petero, imina ijo Eong, adepar lu?"

"Ebo, Ejakait, ijeni Ijo ebe amina eong Ijo."

"Itan amerekekiniKe." Ido abala Ekabaibuli ebe arai Petero etunganan lomam asiomit ido komam isisiat. Eroko erai aisek ikecokok.

34 Imeeban luka okanisa loka apaarasia kangun nuatuboros, ka isadedotin, ka atukono nuetutoritai kotoma apak kangin tikesiliki noi kotoma awi. Kwana, mam eong ajeni ejok arai ijenete yesi luipu (aticepak, yesi itunga luka obuga) eipone loauror awi nako Yuda, eipone loaputor, kwape ajaatar itiang ngul kotoma awi kangin, ka eipone loajaar. Inyobo, ice kotoma otunga lu luikiara adoketaiit luka lolo ti esiliki noi kangina, mam ti elomasi karaida kokek. Konye abu kisiayalamik Edeke, kede Akecoa naemamei ageunet ka esange, apukokin Ngin neejaas luapedorete aijaun Ngin. Luasiomitos, ka itunga lukacoa luka apak kangin abeit cut mam tikepedosi aijaun Ngin. Aponi kes kitidisiarai kanu adumunio kotoma aiboisit kwape kangin.

Inyobo, nasodit, korai kesi kobongoritos neejaas ikanisanakec, kosodete alimor ebe apotu kojauna atukonokin kwape kangin, kosodete aiyun atukos naka ikecokok lumam asiomitos eyangaunete akirosit kwape kangin, tikes kirengear kokanisakec. Ti ecarar kes kinga atukot nako Betelekem, korai tikikamunitete kes epupokinitos atukos naka itunga kwape kangul lumam isisiatos kwape ajaatar ikecokok. Aitidisiar, abeit cut tikitidisiar kes. Korai kes aimorikikin kede eipone loka atukot naka itunga lutai kwape kangul, ka araut...acamun aingal kwape kangin kwape ebe aiyun ebe epedori Edeke ayangaun Aisirareteke neejai atukos naka ikecokok lumam esiomitos, kojaatar kesi nginibore kere isikapikinitai kanuka ngin. Ti kes etwakiasi eidicanekec, ti eraun kes aijal akecepapulai, ido mam tikepedosi acamunio akidingot naka atukos naka atukonokec nuka apak kangin; naarai apotu koupakinos kede ibore kwape kangin, ido mere kede aijen nakabeit.

35 "Eipone ali ikangata yesi aswam ngun!" ti esasedoti ketema atiar. "Ipotu yesi aibositika nakalaunan ne kede aingal kwape kangin, kede abanganut kwape kangin, nabu ecetunganan loka okitui kokinga kangina lomam...mam abu kolosite...toma otabo loegeikini. Kosodete ajaun kede aisiraret kwape kangin, ebe, ' Abu Emalaika kijesun kwap kosodi ainerakin kede kes'?"

Konye dobodo tikorai etunganan atemarit atiar, "Abu eong kaany Akesiraret kitodiara"?

Ti ngol etema atiar, "Ber eong ainak ijo akonipapulai katipet. Kosodi ijo anyoun kotoma atukot kana!" Ijulanakinok apakio konye itunga mam. Ti kiswauna bobo lolo, tikecarar kes kinga naka ekanisakec.

36 Konye apotu ikecokok kopuputu ainapakin kere kotoma aiboisit kangin kede Imerekek yenika Edeke. Ido ecokon edio kere lokajokan iswamai ibore ngipengin. Kengolia ecokon loicokie amerekekin Akirot naka Edeke kisedeleleunio kosodete aitodiar, nuka nuasumunikit Ngesi aswam, ejai do ecokon ngol ore. Mam eongf apodo nuebala idiotunganan, ejai ebe, "Esumunikit Edeke Ngin, ido abu Edeke kiswa Ngin."

Ebalas kesi ebe, "Atuboros apaarasia nuka nukapedor. Emamei ibore kwape kangin ebe Aibatisao naka Emoyo. Emamei ibore ngin kwape ebe Aibatisao naka Emoyo Lokalaunan, arai ngin kanuka ikiyakia."

Konye kolimonok ber ekecokon lokabeit loka Akirot Ngin, kotoma apedor naka ajarun, ebe Yesu Kristo ngopengol bian, lolo, ka ikar kere! Abala Petero kotoma apaaran nako Petekosit ebe, "Erai aisumunet kanukus, ka ikusidwe da, ka ngul luelwaka, kere luenyarauni Ejakait Edekewok." Neenyaraunia Ngesi kere, aisumunet ka arereng eraas abeit. Ido koany ber ekecokon lokabeit loenyami Akirot aitodiaret ngin, mam

itunga luesisiatos akirot nuka ediini kakwap kere epedorete alemar Ngin awai kama ejai ngesi; naarai ejeni ngesi ebe Edeke alimunit kwangin, ido iswamaun. Odaun. Erai duc Akirot naka Edeke. Abu Akekirot koraun akuan kosodi aiboioror kakidingotokec, ido mam apotu kojenu Ngin.

37 Esumunikit Ngesi ibore ngipengin kotoma apak kana. Mam eong ajeni arai ipedori oni amisiikin Ngin? Mam luepogas ka lukacoa apotu kijautu ibore kwape kangin. Ido eyuunitos kesi ebe arai ibore kwape kangin kwape ebe Mesia toma akwap, ebeit Ngin cut abeit kobu neejai ediinikec. Ekoto korai atukosikec nges ebuni aijaun Ngin, arai mam "Mam do ngin arai abeit." Kwana, koomoom ber ijo kagogong noi. Arai mam erai atukosikec, akepolou...Ijo abu komisiik, kolo? Mam Edeke abu koseu idio kotoma atukosikec, konye abu koseu ngul lumam akodakana kede idio kotoma ngin. Naarai apedori atukos adiopet atemar, "Kiany ijo nuapotu isio keswamata?" Ido tikiswamata ibore ngipengin lolo. Konye eseuni Edeke itunga lutai, ngin nges apolou ainakini Nges eseuni ekecokon. Enapakina cut noi ikecokok kede Imerekek yenarai Edeke kakidingotokec, Akekirot eraun akun kakidingotokec. Mam luapogasi ka lukacoa apotu kijautu Ngin, abu kotubor kamakec.

38 Ido ipedori ti oni alimun nuipu kanuka lolo, arai kotoma atur adio. Arai ibore ngipengin kotoma apak naka Martin Luther. Ibore ngipengin kotoma apaarasia nuka Wesley. Arai ibore ngipengin kotoma apaarasia nuko Pentekosit. Konye mam Edeke ebwouni kanuka erionget edio! Isukunyikini Ngesi Emoyoke ngaren kanu aitodiar Akekirot! Akoto ti korai kwangin ido kolomunit kotoma atukot naka aimorimorunakec arai mam mam apedorete aijaun Ngin. Kwape kegogongotor kes akwes noi lolo, ikanisan kere, ebe elosete kesi "aswam ibore mutan, kosodete aisimorikin ikanisan nepepe." Arai emootos kesi ekiyokia kwana, loepedori aimorikikin kere luka Protestants, Itulikin ka luka Orthodox, nginibore kere nepepe, aismamaun ekanisa ediopet lokapolon.

39 Kwana, inacan, kijaun eong kede arereng naka alimonokin neejaas akwat nuka idiinin luegelegela, ido ejaas itunga lukajokak toma ngul kere. Konye kwana, kiitunitos yesi, ajai eong aidwar, "Ngolirionget ejaun acamun nu, arai mam mam araut erionget. Erai abuijin ijo." Ijo isiomit apapula nako Tucson lolo neengaraginiata isasedotin luka Atulik aisirereng, kotoma apapula...aingarakin aisirereng, ko Missouri, etunganan lokapolon loka Protestant? Ido ingaibo ngin ajai acamun ngin? Presbyterian, Baptist, Lutheran, Assemblies of God. Ejai toma apapula nako Tucson lolo.

Oo, isirienguni! Mam erai etunganan loejai toma ngina, erai ingarenok ngul luka apugan naka ediini kes ijerete iboro kotoma kangina, eswamae ngol nges ecakakini ijo tomake arai ikoto ijo arai mam. Mam bobo ijo ipedori araut erionget kosodi aiku anyunyura na naebunokinit akwap, kosodi ijo aanyun arai mam ngin edolit. Aticepak edumuni eong anyou apak naiswamaunor, kongoliasi neejai adiopet kotoma atepun kanu. Ido arai erai kwangin, arai eong ekajenan lokengalat. Arai abu korai kwangin, enerit bodo eong Abeit.

40 Ti enyarata Ngin ebe, "eiponece loka aswam naka emoyo lokaronon" itepigit aoomoomec. Ipupepete yesi nuipu lolo nuikamunitos aoomoom nakajokan: ibwaik ber ijo aomisiokon neejai idiobore, kosodi aoomoom ejok kanuikamunitos ngin. Epedori ajokit aswam ngun! Ejai ibore idiopet bon yeneyait kere, ido ngin nges Akirot naka Edeke. Arai iwomoomoi ijo kitegelikina kede Akirot, kimurwok aoomoomokon. Koomoom Akirot.

"Mesia," aomitos kesi, ebe, "mam apedorio adumun kotoma aiboisit kwape kangin, aigurwokina kwape kangin."

Inoma ber ijo esasedoti lokajokan, lopeti, arai etunganan lokapolon loka odiini, kere itemonokinitai kotoma asioman akiro nuka ediini, abunore kwape awi naileleba aworet? Kosodi acamun Aisiraret naka ekecokon lokican, loetidisiara lomam asiomit, kosodi atemar ebe, "Itei ijo, apedori eong aitogogongoikin ijo Ngin, Ikoku ngin nges yen, na nges Aisiraret ngin?"

Ido ijeni ijo nutikelimutu itunga ngul? "Emunoono etunganan lo, inera ngesi ngun kede eketau kere, konye ibucarit ngesi noi!"

41 Aanyunitor eong itunga ejarete ajar najokan kwape kangin kiton neemam itunga epedoriatu aiyuun, mam epedorete alimun idiobore yenikamunit ngul, konye kobalas ebe, "Abeit cut ibucarit ngesi. Mam bon ngesi ejeni nuinera ngesi nuikamunitos Edeke, mam ti nges iswama ibore kwape nat kangin."

Konye kane ajaatar kesi aitogogonget! Ido akaulo naka aitogogonget, "Kolototo kuju ngina awi kosodete aanyun arai mam Ikoku ngin eperi kangina."

Ti etemasi atiar, "Ilogatai ijo kede emoyo ece lokaronon, loedupo ijo alimun akiro kwape kangin." Konye kere korai kwape ejaar kotoma Akirot naka Edeke! Ido amudukaka kesi noi kanu aanyun Ngin, naarai abu asiomanikec naka ediini kitumudakite kes. Ikoni bo lolo ationis ngin ai!

"Ikamuna kotoma aiboisit kwape kangin? Kotoma aitolitoluna kwape kangin? Kojaatar ngul aiboisit naebus kanu Nges abunore kotoma, ajaatar kesi nginibore kere itemonokitai kanu Nges abunore, ido aoomoom ebe apedori ngesi abunore kwape (kosodi alosit) kosodi mam ayangaun ikesisianakinakec Aisiraret. "Kosodi ainakin Ngin neejai atukos naka ikecokok lumam esiomitos? Kosodi ayangaun Okokuke

obe, kosodi ainakin Nges auruunio kotoma awi? Awi naka nginiduc naka itiang? Ijeni ijo, toma atuba naka inyamat luka itiang? Inyobo, mam apedori araut kwangin!" Mam apedorete aiyuun Ngin, naarai arai naka adoketait nakokwap noi.

42 Ido erai Ngin naka adoketai nakokwap noi, ngin nges apolou einakinik lukacoa itapalaunitos Ngin. Ijesara Ngin noi, itolitolitikit kes. Amootos kesi Edeke awai kokinga kangina, kojai kereka Ngol nepene. Ianyu? Emootos kesi icebore awai kangina, konye kojai nepene kakes kwana: Kristo, ejarunit okatwak, ngesi ngopeengol bian, lolo, ka ikar kere.

Iborekec lukapolok kere aponi ikalamai. Konye abeit cut arai Abeit, ebe, "ajai Mesia." Ijeni oni ngin lolo. Iyuunit oni ngin lolo. Icamunit oni ngin lolo.

Kosodi do arai abu Edeke kisumunikite icebore kanuka ebagalo, esumunikit ibore kanuka apak kana, kosodi aitogogong ebe erai Ngin kwangin, ido inyouni oni awai kama ejai Ngin kwape kwangin, ijai oni da toma atukot ngipengin najaas ngul (kokau kangina kotoma apak kangin) luapotu kinacata Ngin; naarai mam Ngin-mam elomunit kotoma oipone loka ediiniwok. Ngin nges apolou kijaar oni toma aitolitoluna naka ebagalo.

43 Mam Yesu Kristo etwanit, ejari Ngesi. Ejai Ngesi ne lolo! Abala Ebaibuli ebe, "Ngesi ngopengol bian, lolo, ka ikar kere." Ebalala, kotoma Yokana Lokalaunan 14:12, ebe, "Ngin yeneyuuni Eong..." (mere ngin yenisoswaikini, ngin yenebala ebe iyuunit eong) "Ngin yeneyuuni Eong, aswamisio nueswamai Eong iswamai ngesi da. Ido iswamai adepar nu da, naarai alosi Eong neejai Papa." Ido aanyunit Eong Nges kotoma aijaraka, iswamai nuipe kotoma aswamisio kangun (nuabu Ngesi kiswamate kolo) adepar nuiwadikatai apapulai nuka Ebaibuli. Ido ikalami ingarenok ka lukacoa lolo, kosodete apukokin Idwe ludidik kwape kalu epedorete aisisia; kwape abu Yesu kilipia. Erai abeit, eswama Ngesi nuipe adepar...aanyu eong kotoma apakika, kotoma okaruka akaisauni luka aijaanakin, kaany eong Nges iswamai nuipe adepar nuasiomit eong Nges iswamat kotoma Obaibuli; nuipe nuka ibore idiopet kangipekangin.

44 Konye mamace nuabu Ngesi kiswama kolo, iwomit ijo bala abu atukos naka idiinin kiyu Nges? "Ijeni ijo," apotu kotemas, "ilogatai ijo." Konye, kojai, neapotu kesi kiswamauniata aibucaretekec nges angicun...kotoma angicun, mere nuabala ekecetal, konye nuabala Akirot ebe abuni Mesia aswam kotoma apakikec. Ido nen nges iswamaununa oni aibucaret lolo, mam aingic Nuiwadikaere. Abala Yesu kolimok ngul ebe, "Kongicata Nuiwadikaere, tomaKec iwomitos yesi ebe ijaatar Aijar Namam Edaun, ido Ngul kes kitejenunitos nuKang. Ilimokinitos yes Loarai Eong."

45 Koany, ajeni Edeke sek ebe apote kesi aswam nu, ngin nges ainakini nges eyangari Ngin neejaas ikecokok. Ajeni ebe mam tikecamutu, mam ti ijautu Ngin. Kwana kiany do ijo ibore ainakini erai ikecokok? Inyobo araar ikecokok? Mam itunga luesiomitos akiro nuka ediini apedorete aijaun Ngin. Inyobo araar ikecokok bobo? Apedori kereka Ngin abunore kitegelikina kede Akekirot? Mam! Araas ngul ikecokok, ajenete amerekekin; ido ngun nges aurunitai Ngol araut, amerekek, imerekek. Koany, arai Ngesi Imerekek. Ngul-ngul bon kes araas eipone loka luapedorete acamun Nges. Arai ekecokon bon nges ibore yenapedori acamun Imerekek. Ajenete eipone loka aidar Ngin, ido erai kwape kwangin lolo nakidumuna oni Aisiraret naka Imerekek.

46 Kwana ibore yenetirori! Etunganan loetidisiara kakere, lomam asiomit aitubusikin Imanuel kotoma awi. Lo...Ido ajaas itunga kinga ngina, kotoma apaarasia kangupekangun, kisisianakinete ediinikec. Isipanin lukapolok, epote kotoma nginiboisit kere, anatar akwap kere, aponenenete neejaas asuban nuabala Yawe ebe araas "nuketat kokumesike." Ido kane ajaas ikecokok lueyapaara, kotoma awi, itubusikitos Imanuel; Edeke elopet eraun akuan, ido koperi kotoma awi. Itei ijo, eipone ali kede aisisia nakapolon, ka awokokwes ilekooritai kau bala ijeni oni icebore, kosodi Edeke aikalam kere. Ianyu? Iswamai Ngesi nuesumunikit aswam, ido iswamai duc Ngesi ngun. Konye koomoom ber ijo nuka ikecokok kalu; luka adoketait nakokwap kokinga kangina itubusikinitos Eman-...Immanuel kotoma awi. Erai ibore yenetirori noi. Abeit cut etirori!

47 Aso kokinga...Akaulo naka kes aitubusikin Nges, kosodete amisiikin ebe Aisiraret naajaas kesi alimonokin etogogogotoi, ajaas kesi nen...ajaas kinga emaete Edeke kede Aisiraret nationo amisiikin kakere naka Emalaika. Kwana itirian ngin kede lolo. Kobwou ber ijo ipak edit kosodi aomoom. Etunganan ejai kinga aitubusikit Edeke, ido komai Nges kanuka ibore yenabu ngesi koanyunite, nuapupunitos kesi, nuajenete kesi ebe arai Abeit, kede Aisiraret nationo amisiikin kakere kama ejaas itunga luajaatar aijen naka adam. Angolopasi Ngin kede aomoom naka atukot naka ediini ido kereka korai Abeit! Erai Abeit! Apotu kiyuutu Ngin. Ido kwana, epedori bo lolo acoa naka etunganan araut abanganut biai! Kosodete atemar ebe ekwaya (choir) loka Imalaikan kes apotu koyeikisi kes ekosio losodit. Koomoom ber ijo ngun? Ebe ekecokon lomam apedori aiwadik ekekiror, kour bala etogo loka amerekekin, kolosete korotin, iluluete, "Aibuses kojai mama ejai Edeke loejai kuju toma Akuj! Ijeni oni ebe ejai Ngesi toma akwap!"

Abala esasedoti ebe, "Emunaara etunganan ngol akou. Kongic ber ijo iitabon kosodi aanyun arai erai ngesi emeeba loka atukosiwok. Abeit cut itapasi ngesi oni kede aisisianakinetake nuemamei aijen. Kolemasi nges kamawok. Mam oni ibuni araut luetakadikina kakidingot naka itunga."

Ijeni ijo, ipedori ijo araut yenitisilikina kakidingot naka itunga ido kitubusikinitete kakonyen nuka Edeke; arai koseka akoniwai, naarai, kiitu, aipup naka ediini loka apak mam ecamanara kede Akirot naka Edeke. Emameete iponesio akwatakanykoangon luegelegela luka Ngin. Erai eipone ediopet bon, Akirot adiopet, Edeke ediopet. Odaun.

48 Alimun ebe apotu Imalaikan kiyeikisi kes ekosio losodit, ka atemar da ebe apotu kesi "kodumutu Aisraret kama ejai Emalaika." Abu Emalaika kitakanikin kes, koinak kes Aisraret, kosodete kesi alosit kosodete adumun ebe arai Aisraret Abeit. Ido kobala ebe, "Kilema ngun, abu Emalaika koyeik isio ekosio losodit."

"Kinoma ber ijo?" Ebalas ebe, "Ekesa ngol lokican." Mam kes cut ajaunar kede ibore kwape kangin iswamauna kakidingotokec, ijeni ijo, aso arai aisisianakin naetegelikina noi neejaas kesi. Ido ngin nges apolou ainakini kes mam epedorete adumun Ngin kotoma Naiwadikaere, mam arai nakec adumun Ngin. Ationo amisiikin kama ejaas lukacoa, mam ibore kwape kangin eswamaikinar kes cut lem. Mam apatana aiyuun, konye arai Ngin Abeit kwape kwangin. Erai Abeit, ijeni oni ebe erai Ngin Abeit. Koomoom! Ikeyuunak luka Kristo lusodit ka esipan losodit araas ikecokok, mere itunga lukapolok okanisa; ikecokok, ikedarak ibaren. Inyobo araar ikecokok?

49 Koany! Kokinga emaete ido kituritos Edeke kanuka nuapotu kesi koanyunitos ka apupun, apupunitos Imalaikan ewoete irwan nasoditikec neejai etunganan. Mam Imalaikan ayeikitotor etunganan lem. Ido kosenen ikwayai, eipone loapotu kobwoitotor ido kitutuoritete ido kitutuoritete iporotoi ngul, "apotu kowooto kotoma aurio naka Mesia," ido aponi ngul kere kinacai! Kosodete Imalaikan aijesun kwap kosodete awoere neejai ekecokon lotai, lomam anapitigoen luka itunga lukapolok, konye konapiteigoen luka ikecokok. Ido koany Aisraret nasodit, erai naetiono amisiikin.

Ido aiboisit naponi koinakinere, mere kotoma aicokisio, konye kotoma amodingot, kangina kotoma amoding neabu Emalaika loka Ejakait kobu. Mere toma okanisa, kotoma amodingot. Mam ber Nges esukunyunitai kokanisa da. Aomitos ebe arai Ngesi, ido aomit ebe ajaatar kesi Ngin, konye abu Edeke kitogogong ebe adiakara. "Epedori Ngesi kotoma amor kanu aitonyoikin Aburaam idwe." Edolit ngin.

50 Irwan nasodit Imalaikan ayoere kopucit, arai toma Akuj. Arai ipedori ijo aanyun kotoma Yob 38:7, (kwape aanyunitor eong ice kotoma kayesi iwadikaete akiro), neabu Edeke nasodit kitemonokinor aisub Ekesube losodit, akwap. Arai Yob etunganan lokapolon, lokacoa, ido ajaatar iponesio kere luka acoa. Ebalas ebe, "Nealosio eong kuju agwelanareta, akoku naka ekabaka, kere ekukonokinos eong, ido ekotos ipak yenakacoa." Ido mam nges apedori amisiikin ibore yenainakit nges eyaitai koipone kalo ayaitere nges.

Aso abu Edeke kolimok nges, ebe, "Okapakin bala kwape ekiliokit, naarai abunit eong kwap einer kajo." Ido nakebunio Edeke kwap kotoma otapipiro, abu kotema atiar, "Yob, aibo ijai ijo eroko Eong epesikina apetetait naka akwap? Neawootor aacer nukatupuruc nepepe, kosodete odwe luka Edeke ayoere kanuka aiyalama, aibo ijai ijo apakio ngun, Yob?" Ejesuna ngesi kwap komoyo kotoma apak kangin. "Aibo ijai ijo?"

Itei ijo, apak nasodit Imalaikan awoere kotoma opucit, arai toma Akuj. Konye apak nasodit ngul awoere kotoma akwap, arai neejaas ikecokok kotoma aurio naka Edeke, Imanuel kotoma akwap; itunga lusodit apupun Emalaika ewoi, araas ikecokok lueyapaara.

51 Nakilemuna oni awokongor nueculitos ireetin, nuetubitos itim, konapitos luuriesik, kosodete atorokin eceipone loka anapito naka ekanisa airimun kes, kosodete aitobwo kes kosodete awoere bala kwape icebore, kosodete aomit ebe epupokini Edeke ngun? Ejaatar Ngesi Imalaikan kokuju kangina loepedorete aisiayalamikit Nges anyoun e...eroko Nges esubuna etunganan. Uh-huh. Alomun kinga kosodi aijar...kosodi ainap inapen lueraas luketal mama ejai Edeke, ido eipone ali ipedoria ijo aomit ngin araut naka Edeke? Ibalas ijo ebe, "Eebo arai eong loka..."

"Aibo ijai ijo kapak napesikina Eong apetetait naka akwap? "Kolimok eong neabu Eong ayenik kes toma. Aibo ejai amopiira nairimiata kesi kotoma? Aibo ibu ijo kojai kapak kangin?" Iwomit ijo bala ebeit Edeke aingitunun oni ace kotoma acoawok. Acoawok erai bon abanganut mamaKe. Iswamai Ngesi nuelimuni ebe ebuni aswam.

52 Kwana koany, ejai Edeke ekanakin aiswamaun ecesube. Nges asubun akwap naetwani, aijar naetwani. Ewoete Imalaikan kotoma Akuj. Konye kane ejai Ngesi asubun Aijar nakitetet, Aijar Namam Edaun kanuka etunganan, ido ejai ngesi awoere neejaas isubanaKe kotoma Omalaikan; kotoma akwap, mere kotoma Akuj. Akuj ajaatar Aijar Namam Edaun. Ianyu? Kosodi Ngesi aiwo...apotu koyeikisi neejai Akuj, neabu esube loetwani kolomuna toms; ido kane ejai esube lomam etwani alomun, ido kwana ejaas kesi awoere neejaas itunga luka akwap. Irwan nasodit, neejaas ikecokok. Etirori ngin, biai mam?

53 Abu Ngesi kitegearite esube lokitetet. Arai bo ngin inyo? Esube loka Ngesi elopet. Abu Edeke koraun akuan kiboiororoi kamawok. Erai ngin...Abala Ebaibuli ebe, "Kageunet naka esube loka Edeke." Aponi Edeke

kosubunai kotoma ojautene loka etunganan; kotoma Yesu Kristo, Okokuke, eboie Edeke kotoma. Abu koduk eyekaluke loka akuan ka akojo, kosodi aijar kotoma oyekalu kangol; Edeke, Imanuel, "Edeke ejaas kaoni." Abu kodukok Akekuan etogo, kanu aijar kotomake, tetere Nges epedori aitodiar Akekirot neejaas isubanaKe kotoma ngin. Ijeni ijo nuerai Edeke, kiany ijo Kristo.

54 Kiitu, ejai duc ayoere kotoma aurunio naka ekabaka. Imwaasi bo ai ajenete ngun? Ejena, kipotu yesi kojenete. Ijeni ijo, kwana, iwomit ijo ebe korai Ekabaka lo kourunitete kokwap kangina, ti aberu kebu ekeri alomun aicokis kanenice, kosodi atemar, "Kisikapikisi ejamu katipet noi, kosodete alemun itunga luesiomitos noi, naarai alosi eong ayangaun Imanuel toma akwap"? Aberu nakican nalomunit ko Nasaret, ere lokadoketait nakokwap kakere, e...adit adepar Tucson arai idio kotoma ngul kere, ido kereka kobuni aberu na ekeri kokuju kangina neejai esasedoti lopeti lokapolon kosodi atemar, "Eburit eong-eong aidoun Imanuel." Ti ecakakisi aberu ngin ojeera. Abeit cut ti ecakakisi. Abeit cut ti iswamata ngun. Naka aingal kwape kangin ayangaunio akidingot naka iketunga, mam ti epedo aibwo kanuka ngin. Mam ebuni aibwo lolo da. Konye iswama kwape kwangin, koipone kangopengol.

55 Koany, ebeit kojai ayoere. Araas Ikabakan...Mam tikeyeikini Nges. Mam ti itunga eyeikisi Nges, naarai mam eyuunitos Nges. Ido ngin nges apolou...Kobuni kane, ipedori ijo da aticepak adumun Ngin. Ngin nges apolou lolo irumitotor itunga ileic aima Edeke, irumitos kes ileic kanuka Kristo! Aicokisio nukapolok mam epedorete aijaun Aibatisao naka Emoyo Lokalaunan, esipokina kesi kotoma oipone loka ediinikec tetere mam epedorete aijaun Ngin. Elosi Edeke adumun icetunganan yenebuni Ngesi aima kotoma. "Epedori Ngesi aitonyoikin Aburaam idwe," kwape atakuna eong Yokana bobo.

Koany, ibusakinit ikesuban ayeikin Nges. Ido isubanaKe apakio kangun araas kes Imalaikanake, ido apotu ngul koyeikisi neejaas ikecokokoKe luabeit ayangar Aisirareteke.

56 Ingai bo ebeit aige apupun Ngin ber? Ejena ebe, isubanaKe. Ngun kes apedorete aige apupun ayoere naka Ekabaka ber, abeit korai isubanaKe. Ido ali araas isubanaKe? Erai ibore yenetirori noi, biai mam, inacan? Mam arai iketunga lukapolok okanisa. Mam arai luesisiatos akiro nuka ediini. Abeit ngin. Mam arai itunga luka ediini. Mam, arai ikecokok. Inyobo? Arai imerekek aurunitai, ngin nges apolou. Ianyu? Apotu itunga kopuputu Ngin, luajeni Edeke ebe apedorete aiyuun Ngin. Erai Ngesi acoa kere; ejeni neebait aijukar Aisirareteke, ingai iyuuni Ngin. Lopeti lokotoma Akuj ijukunio neejai etunganan loka adoketait nakokwap kakere kotoma akwap.

Abala Yesu, kotoma Matayo 5 ebe, "Isirerengitoi lukican kotoma omoyo, naarai ajaakanut naka Akuj erai nakec." Mariam, kotoma...Arai ijai ijo aiwadik ikokoron ngul, erai nen Matayo 5. Ido arai ijai ijo aiwodik ikokoron...Ngul kes ewadikat eong ne, Nuiwadikaere.

57 Kotema Mariam atiar, kotoma Luka 1:52, nakenyonyokinere nges kede Emoyo, Emoyo Lokalaunan kotomake, abu kotema atiar, "Etopolo Ngesi ngul luka adoketait nakokwap."

Abala bobo Luka da ebe, "Apotu itunga lutai kiirasi Nges kaiyalama." Mere itunga lukapolok, luesiomitos akiro nuka ediini,

Anatar Nuiwadikaere kere nukalaunak, Aisiraret naka alakunio ikecokok kes ainakinete ido kotoma amerekekin.

Kwana abunit eong agolokin, naarai ijai oni adolokin osawa loka agolokin. Ajai eong ailam ikokoron luipu tetere eong etodolikini yes neejai aomisiot na.

58 Anatar Nuiwadikaere kere, ebwoikinitai alakunio kitorunitete neejaas ikecokok ka amerekekin. Edolit ngin. Oni kere icamanara kede ngin. Inyobo? Arai etoribe ka aitupuset. Ido idiobore...Korai mam eong aanyunitor akakan, kasodi eong angoliar kwap ne otoribe loka akakan, kasodi eong aanyun ebe ajaatar eong ibokor ikany, ti eong ajen ebe arai aitodiarit; aput itodiarit ibore ilopet. Ido ngin nges ainakini Aisiraret duc ebuni neejai...alakunio kanuka imerekek, naarai anyoun kageunet alopet...Ido arai kotoma amerekekin, ka kama ejaas ikecokok, nges abu Ngesi kopukoror. Kere araas itoribe ka aitupuseta.

59 Kwana aanyutu ber oni ageunet. Adam ka Keba, ebwoete kangina kakonyen nuka Edeke kanu apupun Akesiiraret mamakec, aenitos angabesikec kede imukulen luka amerekekin. Aisiraret nasodit ageun apupunio, aponi koinakinai kokuju naka emukule loka imerekek yenatwan, yenabu Edeke koyar kosodi atorokin Adam ka Keba tomake. Akaulo naka kes aitam aismamaun ekecediini ikulepek loka akwi nuka etiini, mam ngol apedori aswam. Aponi kitegearai asubanit naka imerekekin kanuka alucio anyoun kageunet, asuban nuka imerekekin.

Kwana, ilosi oni agolor na awai kwana, kasodi aitodikin yes ibore ainakini erai ikecokok; ka ibore ainakini erai, abeit Nges araut imerekek.

60 Kwana, inabin luka Aitutuket Namojong emukora kede imukulen luka amerekekin (ijeni oni ngun, uh-huh), etodiarit ngin aiyuunikec toma Akirotoke naka abunore naka Imerekek. Nges ainakini inabin iswamaete ngun.

Kwana, mam Akirot naka Edeke ebuni neejai etunganan loesiomit akiro nuka ediini, emamei...erai ngol- ngol nges igurwokini Ngin. Edolit ngin. Emamei ibore ngin kwape atemar ebe...Ijo atemar ebe, "Ijeni ijo, erai ekesa lo loesiomit akiro nuka ediini." Isukunyaari bon ngin nges neelwana noi kama ejai Akirot adepar idiobore kere yenajeni eong. Ianyu? Akirot naka Ejakait Edeke, Edeke lomam ijulanakin, mam ijulanakin. Kanenidio kotoma Obaibuli, abuni duc Akirot naka Edeke neejaas inabin. Mere neejaas itunga luesiomitos akiro nuka ediini arai luesiomitos noi, neejaas inabin! Ido duc, nginipak, agirenenio ido angernenio.

61 Inabin duc araas ikecokok da. Anapenenete inabin imukulen luka amerekekin, naarai anapitos kesi emukule loka amerekek ejaas acok. Ido aisiraret nasodit, naajai atur naetubokinitai, arai kokuju naka imukulen luka amerekekin. Inabin, abongokini bobo eong alimun, atoronokinete imukulen luka amerekekin, naarai etejenete kesi kede ngun, ebe eyuunitos abeit Imerekek yenikabeit abunore kanuka asubanit kangin. Ido abunenenei Akirot naka Edeke mamakec kokuju naka imukulen luka amerekekin. Ikecokok lu... arai bo ebe inabin lu duc araas ikecokok. Aburaam arai ekecokon. Isaka arai ekecokon. Yakob arai ekecokon. Musa arai ekecokon. Daudi arai ekecokon. Kere ikabwoikinitok luka Edeke araas duc ikecokok.

62 Kwana ilosi oni aanyun ibore ainakini ngin ebuni neejaas ikecokok. Ajenete ebe emamei ibore epedorete amerekekin aswam arai emamei ekecokon loingarenikini kes. Ngun...amerekek emamei ibore cut epedori aswam, mam epedori alosit kanuke bon. Ngin nges ainakini Edeke itupusi idweKe luyiunito kede amerekekin. Ekotosi aingarenikinio. Konye kongic ibore yeningarenikit ijo! Mam idumuni akinei, ebuni aingarenikin ijo kiton aiboisit naka atubio. Mam Edeke abu koinak oni akinei, abu koinak oni Okokuke (Emoyo Lokalaunan) kanu aingarenikin oni. Ngesi erai Ekengarenikinaniwok, mere ekecokon loiswamaunit etunganan, konye ekecokon loeinakin it Edeke loitanyami amerekekin kede inyammat luka amerekekin.

63 Kwana, kilem ijo epege, kosodi ijo alimokin epege lo ebe, "Alosi eong aitarau n ijo imerekek." Kosodi ijo ailot nges. Kosodi aicul akebelekeka nuka obokor, ka-kaceda. Kosodi ainakin nges inyammat bala kwape amerekek, ainakin nges eceipone loka inyammat. Kosodi aibwaikin nges toma agoola arai kinga toma... Aboisit naenyamananatar amerekekin, amisiri naka irasit yenyenyaritai alfalfa arai icebore. Ido arai ejai aipany naka erit nenidio, ebuni epege ngol alosit arasar cut neejai erit ngol kwape kepedoria alosit. Ianyu? Inyobo? Erai naarai einonoke eroko erai epege.

Ido ngin nges apolou einakit imeeban luko okanisa, lolo, ilumokinos toma oboro luka akwap, itei ijo, erai naarai mam ijulakinitai einono. Epote ainyam ngolipone kere loka inyammat luka ediini, asioman naka ediini, konye Akirot naka Edeke mam epedorete atitingikin Ngin. Elomarete kesi toma kosodete aipup Akirot...

64 Ijeni ijo, etunganan loka esoswai kakere kotoma akwap, nges ekuruk lokolo. Kotoma obaibuli, ajaas iarei luaponi kitolomarai kinga naka ataker. Abu ekuruk koloma kinga ido mam abu kobong, naarai erai ekanyaman akiring natwan, ekanyaman iboro luebosito. Abu kiboikin kuu awat naka akiring natwan kosodi aileleb akekoik kede akiring natwan. Konye nakelacakina ngesi ajele alomar kinga, mam ajele apedori atitingikin abosus ngin, aso abu kobong togo loka Papa ka Noa, kosodi aikungukung ekek kiton Noa angaun nges toma.

Kwana, epedori ekuruk aiboikin kinga ne kosodi ainyam asigiria natwan, apaarran kere, kosodi aporor kinga mam ngina kosodi ainyam akima kede ajele. Konye mam ajele epedori aporor ngina kosodi ainyam asigiria natwan, kosodi ainyam akima da; ti ngin eyar nges. Itei ijo, emameotor ajele ediopiu, ido mam epedori ainyabuk.

Ido ajele adio naka Edeke, ajele adio naenyami Akirot arai amerekek, itiang yenalaunan, kilot ijo ainakin kes iboro luka akwap, ejenete ebe abala Lokapolonikec, ebe, "Ngin yenemina akwapin, arai iboro luejaas toma akwapin, emamei amin naka Edeke kotomake." Kiinak ijo nges idiobore yenitegelikina kede Akirot naka Edeke, mam epedori atitingikin. Konye ajokit epedori ayangar Ngin nepepe kede akwap da, kosodi anyara ngun kere nuka Edeke. Mam ijo ipedori ainyalakin akinyet kede akipi, mam epedorete ainyalakinio.

65 Ngul, ikecokok lu kere, ajenete ebe mam imerekek epedori aswam idiobore komamei ekecokon. Ido araas kesi ikecokok, ido ajenete ebe abeit nges aingarenikinio.

Erai bo lolo aitososit biai aanyun, lolo, ebe etamitos ngul aitan amerekekin, agasia. Konye amerekekin mam epote ainyam ngin. Mam, ipa! Itei ijo, ajaas kesi atamit aitan amerekekin, kokau kangina, agasia. Ido nakebunio Akirot, adaunitos ngul anaikin agasia, mam ajenete Akirot. Ido ikoni nen lolo, neetodiara ibore ngipengin ka aitogogong ebe abuni Edeke aswam icebore. Ido kes adaunitos anaikin noi agasia, ido kitanete agasia, kiton ijo...eebo, emamei einerakin kakes, mam epupokinete Ngin, odaun. Epege...Abala Ebaibuli ebe, "Kwape kebongoria ekingok alekanike, epege da oritike, kwangin kismamata kesi."

Aiirar Akirot, ido abongor cut toma orit ngopengol! Kosodete atemar, "Ah, erai ngin aikerepikinit. Mam iyuuni ibore kwape kangin."

66 Edeke...iswamai amerekek ibore ngipengin lolo, ibusakinit kes amunokin inyammat luka Akirot. Mam ijo

ipedori ainakin kes inyamat luka ediini, amerekekin nukabeit. Mam! Mam! Kilot ijo alimokin kes, ebe, "Kwana koany, ibuni oni kere araun nepepe. Kwana, abu Yesu kilip tetere oni kere iraun 'ipe'" Ipotu yesi opuputu ibore ngipengin ko Tucson pac, apaarasia adis kau, konye erai ngin aingal! Mam Yesu abu kilip... Eipone ali abu Ngesi...Eipone ali ipedora ijo ainakin Akirot atubokin bon, asurokin alopet bon? Akepolou mam do Edeke erai idiobore adepar etunganan.

Abala Yesu ebe, "Eipone ali epedoriata iarei aupakin komam ecamanara?" Eipone ali ilosio ijo alemun Methodist, Baptist, Presbyterian, ka Atulik, kosodi acakakin ngul kere nepepe kosodete araun ipe? Ipedorete yesi araun ipe kokwap naka aingarenikini naka etunganan, konye abala Yesu ebe, "Ebe tetere eraunos ipe kwape araar Eong da ipe kede Ijo." Kwana, ekoto Ngesi oni kere araun ipe kotomaKe naerai Akirot! Amen! Ikoni nen, "Ipe kede Papa." Ido Papa nges Okoku, erai ibore idiopet. Ido erai Akirot ngipengin, Akirot itodiaritai, kitodiara kotoma apak kana kwape abu kiswama kotoma apak kaya, tetere yes iraunos ipe.

67 Koany, abala Ngesi ebe, "Kwape abu Papa kejukuna Eong, kwape kwangin ejukari Eong yes." Papa loejukuni Nges, abu kouparos kede Nges kanu aitogogong Akirot. Ido Yesu ngopengol loijukari itungaKe, elosi kotoma otunga lujukari Ngesi; ido kobala ebe, "Aswamasio nueswamai Eong, iswamaete yesi da." Abeit cut abu Ngesi kilip tetere oni iraun ipe; ipe kede Nges, mere ipe kede erionget. Mere ipe kede eswamae, konye ipe kede Edeke. Naarai Edeke kotoma Akirotoke eraas Ipe, ido Yesu kede Edeke eraas Ipe, ido ijo kede eong ka Akirot ibusakinit araut ipe. Edolit ngin. Ibusakinit oni araas ipe kotoma acamanara kede Akirot. Mere nuebala icetunganan, mam na erai najuli idiotunganan kanuke bon. Koyanga Ngin, nuebala Ngin, kosodi aiyuun Ngin; ido ebuni Edeke aitodiar Ngin, kosodi aitogogong ebe erai Ngin abeit. Iwomit ijo ebe erai ngin kanuka ikiyakia bon, koyanga Akekirot kanuka ngin, kolot kotamak irwanatipet kosodi aanyun. Idumuni ijo ebe ebuni aswam kanukon kwape abu Ngesi kisumunikitor. Eebo, ipa!

Mam epote ainyam agasia, ejai kes ajaut kede inyamat luka amerekekin. Yokana Lokalaunan 10 elimorit ebe, "Akamerekekin ejenete Akaporoto." Ido arai erai Ngesi Akirot, aso eipone loka Eporot ali ejaatar Ngesi? Akamerekekin ejenete Ekaporoto, elongwau mam atupaarete." Ianyu? Abala Yesu ebe, "Elongwau mam etupaarete." Aso, Akemerekekin mam etupaarete eporoto loka elongwau. Mam atupaarete ngul.

Inabin, ikecokok, ka amerekekin, kere kitejenete nuka abunore.

68 Kwana koany ber ijo Edeke lomam ijulanakin kotoma ainapeta nuka Akekirot kapak kana. Kwana koomoom ber idakikan idis: Akirot namam ijulanakin.

Kwana koany! Korai ti Musa kobunite kede aisiraret naka Noa, mam tikiswama. Korai Yokana Ekebatian abunit kede aisiraret naka Musa mam tikiswama. Korai ti Yesu abunit kede aisiraret naka Musa arai aisiraret naka Noa, mam tikiswama. Kosodi Wesley abunore kede aisiraret naka Luther, mam tikiswama. Korai ti Pentekosit abunit kede aisiraret naka Wesley, mam tikiswama; oni apupun napena ngin kitejenunio. Kwana, kinyikokinit Edeke alosit. Kosesen ijo Akirot bon, ianyuni ijo neijai oni.

69 Aso inyobo do mam araunor alimoret nasodit naka ikecokok...arai erai ebe inabin kere, itunga lukapolok lu kere araas ikecokok, aso inyobo do ebeitor Edeke (Lomam ijulanakin) aijulakin eswamaeKe kane, kosodi ayangaun Ngin neejaas luesiomitos akiro nuka ediini? Arai ikecokok. Adolun naka Imerekek yenabeit, ainakineta naka adiakar, abeit abunore neejaas ikecokok.

Ejeni ekecokon akemerekekin adepar idiotunganan kere. Eamei itunganan yenejeni amerekek bala kwape ekecokon, itutuoritai nges aswam ngin. Bobo da ajeni ibore yenenyamete amerekekin, ido ejeni ngesi akemerekekin kanuka ibore yenenyamete. E...korai ijo aanyun amerekek elomari kinga togo loka agasia kosodi ageun ainyam agasia, ti ijo itema ebe, "Kolemas anyaman iboro lukatwak ngol awai." Ianyu? Aso ajeni Edeke neabeit aijukar ngul.

70 Kwana anyarautu ber oni ediopet kotoma ikecokok inabin lukapolok luka Yawe, kanu aitogogong ebe ajai Edeke toma onabin lu kokwap naka imukulen luka amerekekin. Kosesen kwana. Ibuni oni anyaraun ber, losodit, Musa. Aanyutu ber oni ngol. Ajaanakinike itodikini oni Yawe kotoma onabiKe ekecokon. Kwana, ibuni oni alemun aticepak ediopet bon, arai ejai oni apak, kanuka nepetai idakikan itomon luetupakinete. Ibuni oni alemun iarei kakesi, konye aticepak ebuni lo ailosikin.

Musa; Yawe itodiar kane, kotoma onabi loerai ekecokon. Aponi nges koinakinai ainakineta auni kanu aitogogong aijaanakinike ka anyaraunio mama ejaas imakio luka Isirael, ka neejai Parao. Koany ber enabi lo ekecokon, kwana. Einakini Ngesi, duc inabiniKe, aanyunete nakotoma Akuj, kanu aitogogong ebe arai duc Edeke kotomakec; naarai mam epedori ajaun ajakut naka Edeke komam ibore yenapedor kiswamaun. Mam cut Yawe etakanunitor komam ibore yenakapedor etupakini Nges. Ejai atupakin. Aso etodiar duc Ngesi ebe ajai Ngesi kede inabin lu, koipone kalo aitogogong nuadwarete kesi, arai abu korai kwape ajar Akekirot.

71 Kwana, aanyunet-aanyunet nasodit naabu Ngesi koinak neejaas...enabi lo loarai ekecokon (koany), abu kijulak ebela araun emun

Iareikini, abu akekan ibelokin araun atapon.

Iunikini, alemun akipi kotoma Ocilet loka Nile ko Misiri, kosodi aibelokin araun aokot.

Kwana, abu koinak ngol aanyuneta auni kanu aitodikin Misiri, ka Isirael da, ebe arai ngesi Akirot naka Edeke naeneritai.

Kwana, kiitu, abu Musa konyarau esube! Edolit ngin. Abu kolem asinge kosodi aiwelar kuju apak, kosodi atemar, "Kopotu icuc," kosodete icuc abunore. Ebala, "Kopotu icuc," kosodete icuc abunore. "Kopotu adodokai," kosodete adodokai abunore. Abu kitolom esube! Kwana, mam etunganan epedori aisub, konye mam arai etunganan kageunet ber da. Arai Yawe kotoma onabiKe loarai ekecokon! Amen!

72 Koany! Aanyunet nakiuniet naabu Ngesi koinak ngol mam aupanara kede aswamuke, mam aupanara karaida kede etungananike; aanyneteke nakiuniet. Koany, aanyuneta aarei nusodit aupanara kede nges, ngesi elopet kede aswamuke. Ido ajaas aanyuneta aarei bon nuebala Ebaibuli ebe "ajaatar eporoto." Nace ya aanyunet mam ajaatar eporoto. Konye eporoto lokiuniet, arai aanyunet naka akwap: aokot aijulakin araun aokot. Korai ti akoniwokot-akoniwokot aijulakin araun akipi, ti ijo kitwana; kwangin ajaar kama ajai Parao. Nakiuniet aijulakin akipi araun aokot kanu aitodiar-kanu aitodiar Aisirareteke neejai Parao ebe erai Edekewok Edeke loepol adepar Nile, adepar edeke loka Nile. Erai Ngesi Edeke loejai kuju naka nginibore, ido elosi ayangaun atwanare neejai akwap ngin. Ido ngin nges arai aanyunet naka aokot. Oo, ikatunga! Aanyunet kaitebeikin naka atwanare: aokot!

73 Konye nuce kwa aarei ajaasi kede iporotoi luka adwaranut. (A-A-Amuno eong ebe ijai ijo aisiom kwana, kiding naka ikokoron, inyobo abala eong.) Konye aanyuneta kwa aarei ajaatar iporotoi luka adwaranut neejai Isirael nuekamunitos ngarenekec. (Kwana neijaas yesi lujjaas kuju moru pac, neaponi kocakarere amoru kuju.)

Kwana, ido elosi...alosi ngesi aijulakin esube, kanu ainakin ngin aswam kanukec. Kosesen ber ijo epir, kosesen ber ijo emun, kosesen Angolol Nakarengan ka idiobore kere yenabu Ngesi kiswama, kwana. Koany ber ijo ebela ngol loka ekecokon iswamaikini kesi erot loka alosit. Ebela ngon loajai akan naka ekecokon, abu ikalam nginitutubet naka asioman naka ediini ka Iboro kere luabalas isasedotin, kosodi ebela ngol lok ekecokon aingarenikin kes anatar nginibore kere yenimam apedor (kama ejai etunganan). Neabu Parao kotamitor aomoom ebe, "apotu akailan kobwangunos kokuju moru. Kosodi acakar akipi, kosodi ainakin aijulakin araun aokot," kosodi Edeke aitetepun akim kotoma akuj. Kosodi aitetepun akako kotoma akuj, kosodi-kosodi aitetepun ilac toma akwap, ka nginibore kere.

74 Inyobo abu Ngesi kiswama, kede ebela ngol loka ekecokon, mere etabo, mere aomisioit naka luesiomitos akiro nuka edini, konye ebela loka ekecokon. Ijai oni adolokin neejai ngin kotoma apak naedit; ebela ekecokon, Nges abu kiswama ngin. Mere etabo loka ailipesia nuka edini, konye ebela loka ekecokon. Ebela loka ekecokon ingarenikinit akemerekekin, anyau erot kwape alosioto neejai Akirot naesumunikitai ktoma akwap. Erai ibore yenibus noi lolo kanuka ebela loka ekecokon, lolo, kingarenikinit akemerekekin toma akwap naka aisumunet; Aikalam asioman kere naka ediini ka nginibore kere yenika akwap kana, ka iboro lu lukotoma akwap ka idiinin, nginibore kere; apukor erot, ka aitogogongoor Akekirot araut Abeit,"ebela loka Ekecokon elosi ingarenikit.

75 Ido koany, ebela ngopengol loka ekecokon loengarenikit amerekekin...Yesi iyuunitos ngun? Abeit cut engarenikit amerekekin, abu kolak kes aitolomun kinga ko Misiri kede abela ngol kakanike. Abeit ti oni einer nui pu nuikamunitos ngin. Konye atiror nuapolok, abu kingarenik amerekekin kosodi aijukun etube kanu ainger Ngin! Ebela ngopengol loabu koraun arereng neejai idiopet, abu koraun ekenit mama ejaas luce. Akipi ngupengun (nuka alimonokin naka Noa) nuapotu kitajarata nges, kes apotu kotubokisi akwap. Ebela ngipengol loengarenikini Isirael toma akwap naka aisumunet, nges abu kotubok ngul luapotu kongeroto atupakin enabi ekecokon. Edolit ngin, abu koraun ebela loka etube.

Esube; koany eipone loinerar Edeke kotoma osube. Korai oni ajaatar apak. Abu eong ewadikak akirosit ngina: Edeke inera kotoma osubeKe. Imamaeotor oni apak naka aitogogong ngin.

76 Konye aitogogong ekaulo, kede emun loka aisinit loajai kuju naka ebela loka ekecokon loka amerekekin (ebe atorokinit ngesi emun lo, kamoding), enara na nuka alucet nakabeit naka adek ka adiakar.

Ebela da ngol elopet abu kibelokin araun emun kakonyen nuka Parao, kosodi Parao ngopengol aitam aituput kede ikacadak. Kwape kwangin nges iswama Parao loka tinen kwana lolo, ka ikeyuunak luka esoswai, ka ikatuputok luka akuan luka Aisiraret, aitam aituput ibore ngipengin komam ejenete neebunitor; kosodete acakakin Ngin toma obore ice yenika ediini, korai Ngin naelacakina kama ejai ngol kwape elacakinar ekwam kotoma agolorio. Abeit cut! Konye aitam aituput, aiswamaun aitupuset.

Konye, koany, ebela lopelo loka ekecokon abu konyama imunuo luce. Aibo ajaas imunuo ngul? Araas ibelai kokwap, ido arai ebela ediopet bon nges abu konyou aibwo. "Edaunos akuj ka akwap," abalaYesu, "konye Akakiroto mam Edaun." Inera nuka alucet nakabeit naka adiakar naabunit.

77 Bobo da, ngaren naka Isirael aponi koinakinai...Kangina aponi koinakinai kes alakunio kotoma obulesene loka atwanare kede enabi loarai ekecokon kede ebela. Ianyu? Enera ngin nuka Ekalakunana loka Isirael lokoingaren, kotoma atwanare ka okatwak, kama ejai Enabi loerai Ekecokon loibuni oni einer nuke.

Kwana, neejaas ngul kere...kere kwape kijenia oni Isirael, mam apotu ijautu Akiroto naka inabin luaraas ikecokok, Isirael kere mam abu ijau Ngin. Kwana, koany, angurianete. "Oo," neajaar ngesi iswamai nukapedor, "arai ngesi etunganan lokaumokin," konye neadolokina Aisirareteke, "etegelikina ngin." Aanyuneta kere nukauumokin etupakinete aisiraret naitetet naebunit. Ijeni oni ngun. Amodingot apotu ongurianata, kotoma amodingot, kosodi atwakare kotoma olukumin. Kaitebeikin amamei idio kidimarai iarei bon kes apotu kotuboros luaponi kolakunai kotoma omilionin iarei ka atutubet, iarei kotoma omilionin iarei ka atutubet.

Ibala ijo ebe, "Ngun...Nuapotu kiswamaikinos ngul?" Adaunos ngul apaarasia kere.

"Ngul kere Onac Branham, Onac Branham?" Abala Yesu kwangin.

Apotu kotemas ebe, "Apotu lokapapakosi konyamata emanu kamoding, kosodete aimat kotoma Atiida.";

Kosodi Ngesi...Abala Yesu ebe, "Ngul kere, nginidiopet kakesi atwakata," Atiakaros ikar kere, itei ijo, nginidiopet.

78 Koany apotu konguriana kanuka ewai loainakinit Edeke, apolou nainakini kes etwakete. (Kwana, kopupok ejok, mam itwaniari akiro nu adis nukawasia.) Apotu kongurianata! Inyobo ainakini kes etwakikinite amodingot, apotu kongurianata kanuka ewai loainakinit Edeke: kede Aisiraret naka etunganan esiopet, enabi, aingarenikinio naka etunganan ediopet. Kolimokinai eong ibore yenitwasamator Edeke atukos aingarenikin. Ido mam ijo ipedori adumun kotoma Obaibuli. Etunganan ediopet, ngul...Abu Akiroto kibu neejai Musa!

Kora; oni kere ijeni ebe abu kodakun nepepe kosodi angurian kanuikamunitos Edeke araut lomam itirianit iboro, kanu aswam ibore kwape kangin, ainakin ediopetunganan Aisiraret. Ebala ebe, "Oni kere ilaunit. Kanukiinyo mam oni iswamauna ediini? Ido kanukiinyo mam oni ijaunor...asipokin nu, kasodete aswam nu, ka awam ngun?"

Abu Edeke kolimok Musa, ebe, "Kotiakar kamake, apup Eong ido adol do kwangin." Ido kiitu, inera Yuda ibore nginpengin, kotoma apaarasia nukawasia. Edolit ngin, "Apotu komudiaros kopeget loka Kora." Ijeni bobo oni nuapotu kiswamaikinos Kora ka-ka ngul kere luapotu kobuinikinos Akiroto naka Edeke ka acoa naka Edeke naka aingarenikinio naka etunganan ediopet: nginidiopet kotoma kakesi apotu komudiaros.

79 Kwana, kianyuni oni Edeke kotoma onabi loarai ekecokon, kitodiari akeinapeta nukoingaren kotoma aanyunet naka eporoto. Kwana, kosesen. Kiseseni oni ngin kangina, kwana asesenata ngin kotoma aanyunet naetupakini.

Kwana, koany, aponi kijukunai nges neejaas ikenacan luajaas obulesesne, kokwap naka ebulesene, kede Aisiraret naka alakunio, kede aanyunet nainakinit Edeke kanu aitogogong nuabala Ngesi. Abu Isirael kolot mama ejai Aisirareteke, apotu kiyuutu Ngin, nginidiopet kakesi, konye kosawa lokatibong...apotu kolototo aanyun aanyunetake, konye kotoma osawa lokatibong neapotu kesi...abu koinak Aisirareteke, "Arai naetegelikina." Kere lumam apotu kiyuutu Aisiraret ngin, apotu kotwaka. Edolit ngin. Arai bo ani Aisiraret? Arai Aisiraaret naka abunore naka etube. Kotoma osawa lokatibong, abu Edeke kolot toma oidukuru loka Isirael kanu ajenun arai apotu itunga kiyuutu Aisiraret naka ekecokon loarai enabi; ido kere lumam apotu kiyuutu Ngin, apotu komudiaros.

80 Kwana koany, ilosi oni ayangaun ngin mama ejai Ekecokon Lokapolon kotoma adakikan adis bon. Ianyu? Koany ber ijo aijaanakin naka Ekecokon Lokapolon loarai Enabi. Nuka nuapedoriKe, nginikanisa kere abu kopukor kosodi aijaun Nges. Epudas lukadekakakec kitangaleunai. Akoto aswam iboro lukapolok. Ajenarake apol noi. Konye neadolokina esawa lokatibong, apaaran adiopet akaulo naka Nges aijulakin akipi araun ebino, kosodi aitan ilukumin, emugati, kosodi aswam nukapedor, abu kogeu aiboikin kwap kosodi einer kakes. Kosodi alimokin kes ebe, "Eong kede Papaka irai ipe. Kanukiinyo ibalatar ebe, 'Kitodikinai isio Papa?'"

"Oo, onac! Ejai etunganan lo aimarakin ariak kede Edeke?" Arai do ngin nalangir noi kanuka aoomoomec naka ediini. Konye arai Abeit, arai Ngesi! Ianyu? Konye neapotu kiswamata ngun, luipu mam apotu kotupakisi Nges.

Kosodi Ngesi aibelokin kosodi atemar atiar, "Arai mam inyamete Akuan naka Okoku loka Etunganan, kosodete aimat Akeokot, emamei Aijar kotomakus."

Kwana, inyobo iwomit ijo tikeomoom etunganan lokacoa, loka aijen? Inoma ber ijo isasedotin loapotu kopupunitos Nges koyekalu araas luerumitos ileic noi-noi kanu-kanu Nges ajaun ngina. "Aomoom ebe apedori etunganan anyoun kosodi alimun ibore kwape kangin, 'Arai mam yesi itunga inyamete Akakuan, ka aimat Akaokot.'" Ebalas ebe, "Erai lo ekanyamat itunga, itei ijo, 'Ainyam Akakuan ka aimat..' Inyobo, erai ngesi ekanyaman itunga. Yesi itunga lukacoa ipote...ipote anyoun awai kama ejai ebang kwape kangol."

Mam abu kitacau Ngin, abu bon kolim! Abu kiswama ngun kanu aguikin kes, kanu aitiakun Akemerekekin kama ejaas akinei. Abu kiswama ngun tetere ecakari ngul awai. Kosodi kanen amamei bobo itunganan yenakoto aiswamanar kede Nges. Mam apotu kiswamanaros anyoun kapak kangin alosit ngaren. Ianyu?

81 Koany, kotoma apak nakatibong, abu Edeke kolot aitor toma oidukurun kosodi aanyun luapotu kiyuutu. Ido abu kiswama ibore ngipengin kotoma apaarasia nuka Ekecokon Lokapolon. Koany aijaanakin naka Ekecokon Lokapolon loarai Enabi, koany komisiik nu, neejaas ikeyuunak luka Aisirareteke, konye mere...Aisiraret na nakatibong, mam apedorete aiyuun Ngin. Mam apedorete aiyuun ebe arai Ngesi Edeke. Akotosi kesi aitarauun Nges atunganan lokajokan. Akotosi aitarauun Nges enabi. Arai Ngesi etunganan lokajokan ido arai Ngesi Enabi, konye adeparit Ngesi ngun. Ngin nges asisianakin naidila lolo, ebe, "Erai Ngesi etunaganan lokajokan, arai Ngesi enabi." Mam Nges arai idiobore kwap naka Imanuel! Arai Ngesi Edeke itodiara kotoma Yesu Kristo Okokuke, aitarauun Nges ka Papa ipe. Kesi ngun kere nuapedori Ngesi araut.

82 Sekaria 14:7, apedori eong alimun na, inera nuka Aica nakatibong ka Aisiraret bobo kotoma apak nakawasia. Ijo abu kongic ngun? Kere luatupakinete Musa, apotu koanyutu Epir loka Akim loabu kitodia nges kokuju Moru Sinai. Abu ngesi kitejenite nuke, kosodi einer nuka Epir kalo loka Akim ajaut okiot kosodi alimokin nges Aisiraret na, luipu kotoma ngul mam apedorete aiyuun Ngin. Konye kere luketupakinete nges alomun ko Misiri (apotu kolomutu kotoma akwapin kosodete aitub angolol naka atiakun kosodete alomar toma amodingot), apotu koanyutu Epir loka Akim (loenerit ngesi nuke) kitodiari ekecokon ngol loarai enabi araut ekecokon loka amerekekin. Apotu koanyutu Ngin, ido luipu kakesi apotu kosalakisi mam iyuunitos Ngin akaulo naka aanyun Ngin.

83 Koany eipone, loabu bobo, Edeke lomam ijulanakin, Ekecokon Lokapolon loarai Enabi, koyangaria ngul luapotu kosalakisi kede Nges ka Akeijaanakin kiton Moru loka Iseituunin; Ekekocon Lokapolon loarai Enabi, Loinera oni nuke, Yesu. [Aiboisit naemamei ibore katepu-Ekewa.]...?...kosodete akiirar Papa (Epir ngopengol loka Akim) kitodiari Nges, loabu kitodia Musa.

Edeke ngopengol loenera Musa nuke, abu kobu neajai Musa kosodi aitogogong kede Epir loka Akim ebe arai Ngesi Yawe loengarenikit Musa. Ajai Edeke toma naka ekecokoniKe loarai enabi.

Kane kolemoni Ngesi Ekecokon ece loarai Enabi, Enabi Lokapolon, Imerekek Obe, Yesu, kosodi asekun itunga iuni, kosodi ayangar kes kuju Moru loka Iseituunin, kosodi aitodiar Yesu kangina. Kosodi amameun kama ejaas itunga luce kere, ebalas, "Lo nges Okokuka lominat, kiirai Nges!" Ido nakengolarata kuju, mam apotu koanyutu ediotunganan kidimarai Yesu bon. Erai ngin abeit. Arai Ngesi ngol. Kwana, engetakinin ngin akiro kere, kwape kajenia eong. Ianyu?

84 [Aiboisit naemamei ibore katepu-Ekewa.]...?...[Aibosit naemamei ibore katepu.]...?...ereet. Ajai Musa ngaren naka aibuses naka Edeke kokuju Moru Sinai. Abu kijulak ereeteke. Kebu ngesi kwap, ajai nges a-abwaikin aimukoret koreeteke, ekecokon loarai enabi Musa; loajai Yawe toma, kotoma adutakinet, adutakinet bon, ereeteke. Ajaatar ngesi Akirot kotoma akitukuke.

Konye koany neajaar Ekecokon Lokapolon toma akonyen nuka aibuses naka Edeke. Inyobo abu ngin kiswama? Abu kijulak ajauteneKe kere. Mam nges arai atutubet bon naka Edeke, arai Ngesi Edeke kere! Arai Ngesi Imanuel.

Kanukiinyo ainakini erai ikecokok?

85 Koany! Itei ijo, kwana, Edeke Lokapedorosio kere imanmani...kitodiarite Ngesi elopet, atemas, kotoma Musa ekecokonn loarai enabi. Koany kwana abu Edeke kitejenun. (Akalimunet na.) Koany ngol, ebwoi kinyonyoikina kakonyen nuka Epir loka Akim! Amamei idiotunganan komoru cut kidimarai Musa ka Yawe bon. Amen! Amen akepolou ebe, "Ikote nen."

Koany! "Kidokok akonikan atorobukon!" Konye, koany aanyunet na nakiareit kwana aupasi kede eporoto. "Kidokok akonikan atorob." Emamei oni apolou aiyuun ebe arai Musa ekediany, aso etakani abu kidokok akekan nakoteten atorobuke, naarai itunga luipu eraas itetenin. Abu kidokok akekan nakoteten... Kwana koany! Aput naiseseni oni kane, naka Yawe kotoma Musa enabi loarai ekecokon! Musa ebwoikinit Edeke, naarai ajai Edeke toma Musa. Kosesen nges idokokini akekan... "Akan atorobukon." Ikoni bo lolo aanyunet nginai!

86 Kwana, ebwoi ngesi kangina, kidokite akekan nakoteten kuju otauke (kobwoi koipone kalo) aiboisit naebwaitere aiyeiyea naka alakunio anyoun apetetait naka akwap. Nu nges ainakini erai ikecokok. Yesu nges akan nakoteten naka Edeke, ijeni oni kere. Musa ngol ejai nen itodiarit nges cut becebec. Abu kidar aiyeiyea naka Papa, kosodi aitodiar ngun mamawok. Koany, kosesen nges elemuni akekan katorobuke kosodi ainom kede atapon. Etodiarit nuabuni Edeke aswamaikin Akekan nakoteten. Koany, amameotor atapon amukian. Koany, bobo da, mam arai atapon napelem sek, ajai toma adoketaitike nakawasia, okwang kwape akako; aponi kinomai akekanin kede ibore yenaronon adepar. Eipone loabu Musa aticepak kopupunio neabu ngesi kolemana akekan nakoteten kotauke, kotoma atorobuke, ido adumun ebe enomitai akekan kede atapon! Atapon erai aanyunet naka adiakar, namam imukia, ido aitelekaarit kotoma adoketaitike nakawasia.

87 Ido, inacan, nen nges ajai akwap apak nabu Edeke kolemana Akekan Nakoteten kotoma atorobuke! Aponi akwap kinomai kede atapon naeyari, ido amamei amukian kanuke cut. Kwape kwangin atibong na da, naarai mam kes epedorete aijaun alakunio. Aponi kiswamaunai ko Kalvari, konye ekotosi itunga ayangar amukian ace naka etunganan aiboisit naka ayangar amukian naka Edeke kanuka adiakar.

Koany mam abu kolom motimot, kwape duc iswama adek naka atapon, konye abu kotakan irwanatipet! Neabu ngesi kolemana akekan, arai naadeka, eleleba atapon. Koany nuabu Ederke kolim, "Kwana, mam ijo ibuni alelear toma adiakar mot mot; konye apak nainyamia ijo, apaaran ngin itwania." Ido erai ngin abeit, "Apak nainyamia ijo ngin."

88 Koany, arai ekecokon loarai enabi nges abu inom akekuan. Abu koyanga, aicorakinet naka Edeke, kosodi aibwaikein akekan elopet atorobuke, kosodi alemun edeka atapon. Ekecokon loarai enabi, Yesu, abu kiswama ngin ngesi elopet. Ido Ekecokon Lokapolon loarai Enabi, Yesu, abu kiswama ngin Ngesi elopet, "Ejaikin Eong elopet bon Akaijar, emamei itunganan yenelemari ngin kamaKang." Arai Ngesi Ekecokon Lokapolon, Ekecokon Lokapolon loarai enabi, "Emamei yenelemari ngin kamaKang, eswamai Eong ngin Eong elopet." Konye mam abu kobu mot mot, abu kobu katipet. Ekecokon Lokapolon elopet, Ngesi elopet, abu koyanga adiakariwaj kosodi ainomakin Ngesi elopet bon, abu koyanga adikanaretawok kosodi aimarakin ngun mama ejai Ngesi elopet. Komam abunokin nges ainakini ekewadikan iwadikai ebe:

Kokiding naka imor luabulonoros ka akuj naajai amutonor,

Abu Eketajaranika kitulur Akekou kosodi atwanare;

Abu aimukoret nangaara kopuko erot

Loelosi neejai aiyalama nakotoma Akuj ka apaaran namam enangi.

89 Abu aiyeiyea ngin kojai toma atorob naka Edeke ikar lu kere, korapite Akekan nakoteten, Yesu. Abu Ekecokon Lokapolon koyanga mamaKe adikanaretawok. Isaia 53:6, ebalala, "Aponi kimusungai kanu numam adolitewok. Komacarai kanuka epaliwok. AisiriebioKe arai kanuka ainapakiniwok. Ido imacariniKe kes itangaleunere." Aiyeiyea naka aitangal naka Edeke aperi kotoma atorob naka Yesu Kristo, arai Edeke, ajai Ngesi toma akan nakoteten naka Edeke, ngin bon nges Amerekek nasalakinit toma atorobuke aiyeiyea. Ngin nges apolou ainakini aitupuseta kere nuka Ngin nualingakinete eraas amerekekin! Nasodit arai imerekek, nakawasia arai Imerekek. Ngin nges apolou nainakini Ngin ebuni neejai ekecokon, kanu aitodikin eipone loka aidar Imerekekike. Kiany ijo Ngin? Koany, "Aponi Ngesi kimusungai kanuka numam adolitewok, komacarai kanuka epaliwok, aisiriebioKe arai kanuka ainapakiniwok."

90 Koany, abu kobu katipet; ido abu konyou katipet, katipet napelemario akan nakoteten kotoma atorob irwan nakiareit. Abu adek nakaronon konyou, nealemari ngesi irwan nakiareit. Ido neabu Ekecokon Lokapolon, nakedaunia aitac alecoret naka adiakar kanuwok kere, abu kotema atiar, "Adaunos." Abu adiakar kongetakin, aponi kotacai alecoret, aponi apesenin kotacarai! Mam abu koyangaik ekar, arai ebe abu kodolok araun ngin kotoma apaarasia nuka ekedikwarunan ece arai icebore, apotu kongetakinok kapak kangipekangin!

91 Abu adiakar kobu katipet, koipone loka apaliikin Ekisil loka Edeke, koipone loka aibil Akivot adiopet. Atibong na, inacanaka, ejai etaunok okatwak koyenitete korikoi. Ido mam erikot ngol erai aisisianakin ace naka osomero loka ediini, mam erikot ngol erai ecediini arai ecetal lojaria ijo, erikot ngol nges Akivot naka Edeke! Abu Edeke koinak etunganan Akekirot kanu ajaria, kosodi Keba aibil arucokinet adiopet naka Ngin. Kosodi e...ediorikot kere mam egogong adepar arucokineteke. Kilema ijo Akivot adiopet...Arai ngin ageunet naka Eitabo.

Abu Yesu kolom kokidng naka Eitabo, kosodi atemar, "Mam etunganan ejari kanuka atap bon, konye nginikirot naelomuni kaituk naka Edeke." Arai nen kiding naka Eitabo.

Awasia naka Eitabo, abu kotema, "Yenelemari Akivot adiopet (aijul erono Akivot adiopet), alemar Akivot adiopet kotoma Kane, alemari Eong atutubeteke kotoma Oitabo loka Aijar." Itorit ijo kuju naka okatwak, ikaja kotoma Akivot naka Edeke. Mam icamakini icetunganan aicikakin icebore tomakon yenimam erai EBALA EJAKAIT KWANATA!

92 Oo, etei eong...Eebo, ebalas ebe, "Abweit cut, kere nuiswama oni. Kere nuiswama oni!" Ngun aticepak aomit esasedoti lopeti ka ngul kotoma apaarasia nuka Ekecokon Lokapolon. Ngun kes aomit

Keba. Ngun kes abu Satan kolimok nges, "Abeit cut mam Edeke ebuni aswam ngun." Konye abu kiswama, naarai abala Ngesi ebe ebuni aswam. Ido ngin nges ainakini Nges aswam ngin bobo lolo.

Komam abunokin, kwape abalar Ngesi, ebe, "Kwape ajaar kotoma apaarasia nuka Noa, neaponi kitajarere itauon ikanykauni, kede akipi, kwape kwangin ejaunor kotoma apaarasia nuka abunore naka Okoku loka etunganan." Itei ijo, ikidioko noi, "Elal erot, ido ediding erot loelosi toma Aijar, ikidioko luedumunete Ngol." Edolit ngin. "Naarai elal erot loelosi toma amudiaro, ipu luitorete toma."

93 Neaponi kinomere Ekecokon Lokapolon loarai Enabi, neaponi kinomere Nges kokau kangina, abeu kotema, "Adaunos!" Ido kotoma adakikat kanen, katipet kedaun ainom Ekecokon lo, apotu kodaunos. Adaun aitemokin akirot naka adiakar, amamei bobo adiakar. Alaete do kesi, aponi kodaunai aitac aitsilaret. Ikeyuunak luewadikatai ikecekiroria oitabo loka Aijar, luasekikinitai sek anyoun apetetai naka akwap, apotu kodaunos odakikat ngopengol loabu Yesu kotemaria ebe adaunos. Nges, Ekecokon Lokapolon, abunit kanuka Akemerekekin. Apotu odaunos, aponi kolemarai akan naka Edeke nakoteten kotoma atorobuKe, edeka. Kosodi do Opasika abu kinyakak ngin (amen), abu ikeu ngin kuju bobo toma atorobuKe, kosodi aisukunyun ngin kwap neijai ijo keong, kotoma ojautene loka Akirotoke, kanu alakun oni ainyakar omanikoriKe losodit loabu adiakar ikamuna oni. Aiyeiyea naengadad naka otauKe Lokapolon aponi kopukoroi Ekecokon loarai Enabi. Abu Ekecokon kopuko, Ekecokon loarai Enabi.

94 Nges ainakini imor esomanaros kosodete aiworo kotoma apaaran kangin. Nges ainakini akolong ibwai akekonyen kosodi elulu kanuka aiyalama. Nges ainakini esube kere elacakin; abu ekwam ijangijang ikito kiton neapotu kijangijangunotor kosodete aijangijangun, kosodete aiyalamikin, ka asomanar. Apotu koanyutu Ekecokon loarai Enabi, kokuju moru, elakuni nginikiror loajai toma Oitabo loka Aijar. Kosodete aanyun ebe esubekec da elopet aponi kolakunai! Apotu kiworoto, kosodete asomanar. Kosodi akwap alomar toma amaran. Kosodete imor abwangabwangaun, ka irongan aibironor. Kosodi akolong aijesar kwap. Kosodi nginibore aiswamaun. Kwape airiamun adio kere kipukok ijo Ekecokon ebe "Adaunos!" Kangina...

95 Aanyunitor eong ijautenesio luka asomanar, ka ijautenesio luka aiyalama, konye amamei itunganan yenabu imusungun. Apotu imor iworoto, kosodete ngul...abu akolong ijesar kwap, kosodi nginibore kere aiswamaun, konye amamei itunganan yenabu kimusungun. Ido aanyunitor eong airiamununeta nuabu apedor naka Edeke kopukoror neejaas itunga kiton kes "alacakin kama ejaas akwapin ka iboro luka akwapin," kosodi aiyalama naka Ejakait alelebun osipan. Apotu kobwaata kosodete elulu, kosodete aiworo, ka acelanar kede ikeceporotoi kere, kanuka aibuses naka Edeke. Mam eong aanyunitor idiobore ejai kinga naka ainapeta, ajaas duc apak kere cut toma ainapeta; naarai apotu komisiikisi ngun, ekecekiror loaponi kiwadikatete toma Oitabo loka Imerekek loka Aijar eroko apetetai naka akwap. Abu Ekecokon lokapolon loarai Enabi koyangaunite kes Aisiraret, kosodete alakun kes, Ekecokon loarai Enabi. Mamace nuabalas ainapeta ace nuka ediini kanuikamunitos Ngin, ajenete kesi nuapotu kiswamauna. Kwape apotu ikecokok ngul kiswamatotor kokau kangina, ajenete nuapotu kiswamauna.

96 Emamei itunganan yenejaatar apedor alomar toma aiboisit nakalaunan alimonokin Akirot kiton nakiswama kwape abu Musa kiswama, airiamun kede Edeke, ngesi ilopet, kotoma aiboisit naemamei loesiomit akiro nuka ediini loepedori aitetemun Ngin alemar awai. Ajai Musa ngina! Mamace eipone loapotu ikiyakia luka Isirael kotemariata, "oo, amamei ibore kanen, abu bon ijo inomarite ainomarit ebe abu koany nu; erai ibore yenemamei ajokis, mam ijo ipedori alemar Ngin kamake, ejeni ngesi! Ajai ngesi ngina! Arai nges abu ngin kiswamaikin! Ido emamei itunganan yenejaatar kede ediguri loka akiro nuka ediini arai bo ediguri loenyaritai doctor yenejaatar apedori kokau naka elutaari, einer Aisiraret naka Yesu Kristo, kiton ber nges nasodit ariamun kede Edeke ereet ka ereet kotoma Opir loka Akim. Emameotor ngesi apedor anyaraikin bon ebe ekiyakia, naarai luesiomitos akiro nuka ediini kere kotoma akwap mam epedorete alemar Ngin awai kama ijai ijo. Abu kiswamaikin ijo! Ijai ijo ngina, ijeni ijo nukamunitos Ngin. Mamace nuebala idiotunganan kere, arai itiasi ai nuepedorete kesi einer, "atuboros apaarasia, mam erai kwangin," ijo...abu ngin kiswamaikin ijo, ido erai kwape ejaar Akirot.

97 Eebo, ngin nges ainakini Musa ejeni ebe abu Eporoto lo kinerata kanges, arai Eporoto loka Akirot. Ajeni ngesi ebe abu Edeke kolimokite Aburaam ebe, "Ebuni aurikon airim adaun ikar akwataongon, konye abuni Eong alakun kes." Ido ajeni ngesi ebe angetakinos ikar akwataongon kosodete anyaraun nges kanu aswam ngun.

Ekiliokit ka aberu, abu Edeke kisumunikite kotoma apaarasia nukawasia ebe abuni abukokin Ekemoyo neejaas awat kere. Esumunikit Ngesi ebe abuni aijukun Aibatisao naka Emoyo Lokalaunan, ido ebe abuni Ngesi anyaraun Ateran naemamei akemer arai asukokinet. Esumunikit Ngesi aswam ngun, ebuni aswam ngin. Siripupok ikecokok lu luiswamaete kanuka isirigin, epote angarenikin ijo awai. Erai Lokalaunan nges Ekecokon loebait aitan yesi inyamata luka amerekekin kotoma Akirot kana. Kopupokisi Nges, iras yesi amerekekin nuka oronyiKe; arai iras yesi, kiirasi Eporotoke. Mere nuebala icetunganan, kopupokisi nuebala Ngesi. Eporoto loitegelikina, mam ijo ijeni idiobore yenikamunit ngin.

98 Oo, ikatunga, kopupokisi ekecokon lokapedor loerai enabi bobo, aijul ka aitodiar mamakec, Yokana

(apak nabwoio ngesi kocilet Yorodan), koany nuabu ngesi kolim (ajai ebwoi kangina, elimonokini), ebala ebe, "Ebunit esawa..."

Koany, arai Yokana okoku loka esasedoti. Atupitos duc kesi ekokoro loka papakec, eipone ngol nges idumunia oni ikiroriawok. Kanuka idiobore yeneswamaete kesi, anyarao kesi ngun. Ido abeit ti Yokana araut esasedoti kwape papake.

Ido, ijene ijo, totoke, abu kisimonikina, akaulo naka Emalaika loka Ejakait airiamun kede papake Sakaria, kosodi alosit ore neejai Elisabet, ido arai ngesi ilapio ikanykape kotoma...kanu araun toto. Konye amameotor ber ngesi ajar, akurianikit ngesi naarai mam ikoku asubakinar. Mam ngin ibecokina.

99 Kosodi Emoyo Lokalaunan, Emalaika loka Ejakait atakanikin Mariam, kosodi alimokin nges ebe, "elosi ngesi adumun ikoku komam ejenunit ediokiliokit," kosodi alimokin nges nuikamunitos ejautene loka Elisabet.

Abu kolot kuju orongan luko Yuda, kanu alimokin Elisabet. Ido nakeriamunotor ngesi kede Elisabet, abu kolimok nges ebe "alosi araun toto." Ido mam nges apedori amisiikin, "komam ijenunit ediokiliokit." Konye abu kotema, "Abu Emoyo Lokalaunan arapia eong, kosodi atemar ebe Ibore yen yenalaunan yenebeit eong auruun eponio anyara 'Okoku loka Edeke,' ido abuni eong anyara Ekekiror 'Yesu.'" Ido apak nasodit naponi kolimunere ekiror Yesu kaituk naka etunganan, abu ikoku yenididi yenatwanit, kotoma akoik naka totoke, osomun kanuka aiyalama kosodi adelor; kosodi asomar kotoma akoik naka toto, ido mam ber adumunitor ajar.

Abu Ekiror loka Yesu Kristo kinerak ajar toma okoku yenatwanit. Inyobo ebeit Ngin kismama kotoma okanisa loebala ebe euruunitai irwan nakiareit?

100 Ido iboie oni erugugitos bala kwape aruguget naejai kuju naka akolilit, kasodete acamakin iboro kwape kangul alosit ngaren. Ido akuriaka anyoun kasodete aitejenar aipupuwok, kasodete aitoron iboro lu kere luemamei ajokis, aitejenar Yesu Kristo kwape ngesi ngopengol bian, lolo, ka ikar kere. Erai apak naka ebaga, konyoutu kama ejaas aputosia nuka Santa Clause ka iboro, koria kede amamus aijen ngin naka aitarau kwape ibore yenisubisaere. Aibo ipupunitor ijo nuikamunitos apotusia nuka Santa Claus kotoma Obaibuli? Erai aibe naka Iromayon, emamei ibore kotomake cut, emamei ibore kwape kangin. Mam isisianakinete ikusidwe ibore yemamei ajokis kwape kangin. Konye kobeite ijo alimokin nges ebe arai kere awaragan naka amudukanut, akepolou ingala ijo neejai ikonikoku. Ido ebuni ngin aimusung ajanaanutukon naikamunit Yesu Kristo Ekecokon Lokapolon loarai Enabi abongor neejai ebaga neebit Ngin kojai.

101 Koany, kopupok enabi lo, Yokana, kwape kebwoio ngesi kangina. Oni kere ijene ebe arai ngesi ekecokon lokapolon loarai enabi. Kwana, ajaatar ngesi aisiraret, ajeni Emalaika ebe alosi ngesi aitodiar Yesu.

Kwana, mam nges apedori alosit neejai esomero ece loka ediini. Kosodete ti ngul atemar atiar, "Kwana, ijene ijo Doctor Mutan nges etunganan loebait ayangar aiboisit ngin kwana. Ebeit ijo aitodiar nges. Ido ijene ijo ebe..." Itei ijo, mam nges apedori ainyalinyalun kede itunga.

Kotoma okar ikanykaongon lukapolou, ilimokinitai oni, ebe, abu kolot toma amoding kanuka akapanakin kakonyen nuka Edeke. Ngina nges aponiananata ikecokok. Koany aisirareteke mam arai bala kwap loesiasiat akiro nuka ediini, kede acekiro nukapolok nutiek nuadakunun nuka ediguri ece. Abala ebe, "Oo, yesi aur naka imunuo." Elimonokini itunga luediinikitos, "Yesi atukos naka imunuo." Ngun kes aanyunit ngesi kamodingot, aanyunit emun, kosodi anyara isasedotin ngul ka itunga lukapolok okanisa ka luesiasiatos akiro nuka ediini luka apak kangin, ebe, "Atukos naka imunuo!" Ebala, "Ingai ikwenya yes aiku anyunyura naebunit? Sirikigeutu atemar ebe, "Irai isio luka lo, ido irai isio luka ngol," naarai atemar yes atiar epedori Edeke aityoikin Aburaam idwe kotoma amor kanu." Amor, nuaanyunit ngesi kamoding. "Bobo da, iperikinitai aep kwap naka nginikitoi." Ngul kes iboro luabu ngesi koanyunenei; imunuo, ikito, amoding. Ido, itei ijo, arai ngin aisirareteke. Mam nges ajeni akiro nukapolon nuka adakunun nuka luesiasiatos akirot nuka ediini (ti itetemutu Ngin awai), abu kolimonok cut bebec kokokoro loka esube.

102 Ngun kes ijai oni aitodun kane: ebala loka ekecokon, ekecokon, amerekek, ekokoro loka esube.

Inyobo abu ngesi kismama? Ajaatar ngesi ibore yenapolon yenabeit aswam, arai nges abeit ajenun Mesia. Ebala ebe, "Abala eong ebe, 'Ebwoi Ngesi kane akidingotokus kwana. Ido mam yesi ijenete Nges, naarai kiyenit yes asiomanikus naka ediini, mam yesi ijenete neiijaas.'" "

Apaaran adiopet abu Yesu kobu elosi akej, ebala ebe, "Koany, Imerekekin ngin yenika Edeke ebunit yenelemanar aronisio nuka akwapin." Imerekek! Aleluia! Alucet obe! Engol ebunit loabu nginimerekek anyoun komanikor loka Eden abongun kwap kitupusite, Etunganan elosi aijesar kwap ocilet.

103 Apotu kotemas atiar, "Yokana, eipone ali ijenuna ijo Ngin? Mam eong abu aany idiobore yenitegelikina."

"Konye arai eong ekajenan, abu eong aany Emoyo loka Edeke ijesun bala kwape ajele, kosodi Eporoto atemar atiar, 'Lo nges Okokuka Loalelia Eong aiboi kotoma."

Kosesen ajele kede Imerekek. Iany? Eebo. Dobodo korai ti nges korai e...Dobodo ti korai ngesi orai icebore...Dobodo tikorai ecekue abwoi kangina? Eebo, mam ti Imerekek ngin kelot toma...arai Ajele ngin... itupusi Edeke Akekuan kede ajele, ikweny yenyapaara kakere kotoma okweny lukotoma akuj; Okokuke loka amerekek, itiang yenyapaara kakere kotoma otiang kotoma akwap. Itei ijo, ikweny yenalaunan yenikotoma akuj, mere ekuruk; mere ekanyaman akirirng, konye ajele. Mere epege, konye imerekek. Einono ece mam ti epedosi ainyalakin nepepe.

Ido koany neabu ajele kobunio neajai Imerekek, abu kingarenik Nges. Mere koipone kalo akotor ngesi, konye koipone kalo akotor Papa aingarenikin Nges. Kwangin nges ejaar imerekek yenikabeit lolo. Wu imerekek yenika apak naka abaga, mam kereka ijo ijeni ebe ingarenikini bon Edeke kede Akirotoke? Ngol nges Ekebela.

104 Koany mam ti icebore kiswamaun, konye abala Yokana ebe, "Luce kwi kere mam apotu koanyutu Ngin, konye arai eong ekajenan, 'Abu eong kaany Ngin'" Aitodiar: "Koany, Imerekek yenika Edeke yenelemanari aronisio nuka akwapin."

Biai do kwana eong etejena Aisirareteka naka ebaga, ido kwape agolokina eong kwana: "Yesu Kristo ngopengl bian, lolo, ka ikar kere." Erai Imerekek ngin. Eroko Ngesi erai Imerekek ngipengin kwape araar kangina, naarai Akekirot nges ngipengin. "Neetukokinos iarei arai iuni Kokirorika, ajaun Eong akidingotokec." Ngun cut becebec nuabala Ngesi. Mam Nges ijulanakin, erai Ngesi Edeke Akirot. Mam Nges ijulanakin; eroko einanakini akemerekekin, ido itani kes kede Ekecokonike loerai Enabi, inyamataKe luka amerekekin ber nasodit. Mere neejai loesiomito akiro nuka ediini; neejaas Akemerekekin.

105 Mam kes epote...Eipone ali epedoriata ngul luce ainyam Ngin. Konye lukacoa...Komisiik na! Konye lukacoa ka luka aijen, luitutuoritari luka akwapin, eroko ipudas aiboi kanen nges aputosia nuka Santa Claus. Ido ejaas iponesio kere luka iboro lumam eraas abeit ka iboro luemaete kesi, naarai mam epedorete acamun Nges, Akirot; naarai kotoma odiininikec, mam iriamara kede aipupukey, ikecokok luetacio luka apak kana. Luetacio kotoma otal, luepote akotokin aimorikikin yes kwap naka akinei adiofet, mam icamunete ngin! Ingarenikinete yesi toma aiboisit naka atubio. Kiirasi Ekecokon Lokapolon loaponi kouruunai ikar elukumit akwatakanykaongon kau, olap lo. Acepaaran kokinga kangina, kotoma Aisiraret kana, apotu ikecokok kopotu luajenete eipone loidaris amerekekin.

Kojeni ebe, eroko ipudasi ngun. Mam epedorete acamun Ngin lolo, cut kwape apotu kiswamata kolo, naarai mam ibecokina kede aipupukey naka ediini. Ijulakinete kesi Akirot ngin kosodete ainakin ngin aibecokin kede eriongetekey, ido mam epote alimonokin Akirot. Mam epote! Ebalas ebe, "Eebo, arai ngin kanuka apak naka ikiyakia. Mam akepolou erai kwana." Epeleikinit Ngin cut becebec nuinera, mam Ngin ipuda idiotunganan ai...?...aijulakin kes Ngin.

106 Kwana ketulurwoto awokokwes kotoma osawa kalo ka itauon kwap apua naka akwap, kasodete aruruk katipet neejai atuba nakabeit, aanyun ka aijaun Aica naeyangauni Akirot na kama ejai Ekecokon: Ekecokon Lokapolon loerai Enabi, Yesu Kristo Okoku loka Edeke. Abu eong ener kayes adaun aojau. Aticepak mam eong etemonokit akakiro ejok kwape tikiswamata itunga lukapolok, mam eong atamit aswam ngun. Atamit eong einer Ngin kwape einakini Ngesi eong Ngin.

Konye, ijo kiany ibore ainakini erai ikecokok? Luce kwi etutuoritari noi kotoma aomisioit ace kiton neemam apedoriata aijaun Ngin. Ido lolo ijaatar oni iponesio kere luka ikaanyanarak, itunga lueyaitos edistrikt, ipisikopin, isasedotin, cardinals, ipaapan, nginibore kere kotoma akwap, kanu aitam aingarenikitt oni. Konye abu Edeke koinak oni Ekecokon, ido Ekecokon ngol nges Emoyo Lokalaunan.

107 Kopupokinai eong kwana. "Neabu Ngesi..." (mere aomisioit, erai Ngesi aalimunet naitodiarit ebe arai etunganan) "Kebu Emoyo Lokalaunan (Emoyo loka Abeit), epukori iboro lu mamakus lualimok eong yes, ido itodikini yes akiro nueponitos." Erai lo Ekecokon Lokapolon, Ngol nges Ekecokon loabu Yesu Kristo kojalak. Ido Emoyo Lokalaunan nges ewadikai Ebaibuli, abala Ebaibuli kwangin, "Itunga lukolo, ewadikaete Akirot, kingarenikite Emoyo Lokalaunan." Kwana Emoyo Lokalaunan epedori kereka airiar ijo neejai etal? Epedori kereka airiar-airiar ijo neejai ibore yenimam Akirot na elimunit? Inyobo, mam cut epedor. Eraun do ti Emoyo Lokalaunan ekengalat arai elimu Ngesi ebe, "Nu kes nuibusakinit yes aswam," kosodi aibelokin kosodi atemar ebe, "Mam, arai Ngin aibucaret, kosodi ijo aswam nuebala ekanisa aswam."

Kwana, arai ibu ijo kojai apupokinit icebore, yeneria ijo awai kama ejai Ekecokon elopet, lokabeit loingarenikini ijo neeja Akirot, Emoyo Lokalaunan, ido komameotor ijo adiojanaanut naiswamaikina ijo, ido komameotor ekajenan loka Emoyo Lokalaunan kotoma Aijarakon, naarai arai emamei...

108 Erai Edeke ediopet. Edeke bon nges ejaatar Aijar Namam Edaun, ido erai Ngesi Aijar Namam Edaun. Ido idiobore kere yenajaatar ageunet ejaatar esange. Ido arai irai bon ijo emeeba loka okanisa, ajaatar ngol ageunet. Konye Akirot naka Edeke emameotor ageunet, emameotor Edeke...Ido kiwuruun ijo Edeke,

kiwurunitai ijo kede Akirot, akepolou iraun do ijo Okoku loka Edeke, ido aponi kibwaikinitete ekonikiror Oitabo loka Imerekek loka Aijar eroko apetetait naka akwap. Ido ijo, eriagi loka itim loijaatar ijo, eriagi loka akonye nuijaatar ijo, esubune loijai ijo toma, abu Edeke koany ijo eroko epesikina apetetait naka akwap. Ido abu Ngesi koany ijo, ikar emilionit eroko, emamei ibore yenedepori atukurwor ijo abongun toma asima ngin naitekooro nabu Edeke kosekik ijo kotoma ageunet, "Akamerekekin iirarete Ekaporoto, elongwau mam etupaarete."

109 Ido arai mam ijo icamunit Aijar ngin Namam Edaun, atibong na ido koseseni ijo acewaragat namam erai abeit naka imukeru yenididi eperi kotoma a-a-atuba, ka atukos naka itunga elukunitos, mam iyuuni iboro kwape kangul. Ido atamit aomoom ebe, "Eebo, ebuni ajokiar. Ido abuni eong aswam nu. Ido abuni eong alomar okanisa. Ido kesi ngun kere nuepuda eong aswam." Iwoliorit ijo. Arai imameotor ijo Aijar Namam Edaun, eipone ali ipedoria ijo aijar ikar kere?

Ipedori ijo alemun ekinyomit loka emudunga, mam eong apodo eipone loetakana ngesi elai, ipedori ijo aiswa-...Eswamau science ekinyomit ngol, loipedori ijo aitub angaar: ejaatar eipone ngopengol loka alilim, ka eipone ngopengol loka etau, iboro ngupengul luejaatar ekinyomit loekorikinitai kinga omanikor, ibore ngipengin. Ipedori ijo aibwaikin kes aiboisit nainwakere, ido mam ijo ipedori atiakun ediopet kama ejai loce: iswamauni ediopet atap naka euga naejok kwape kaloce, iswamaun ediopet akuma nuka euga nueputosi kwape kanu iswamauni loce. Konye eipone ediopet bon loipedoria ijo aitiak kes. Ediopet loesubit etunganan, esalakini nen, ebosi, mam bobo elomuni. Konye lokesubi Edeke, ejaatar ikinyomit yenika aijar, ejaruni bobo.

110 Ipedori ijo aituput Ekristayot, ipedori ijo alosit okanisa kwape Ikristayot, ipedori ijo aibwaikin ekonikiror oitabo bala kwape Ikristayot, ipedori ijo alomar odiini bala kwape Ikristayot; epedori ngin komamei ationis, konye arai emamei Aijar Namam Edaun kotomakon nabu Ekecokon ngol Lokajokan koinakina Akeijar, kanu atiakun...Neabu Edeke kijesunor kwap ko Pentekosit, abu kobu kotoma alunguret naka akim kwape abu Ngesi kiswama kokuju Moru Sinai, kwape abu Ngesi kiswamaikina ekecokon losodit, Moses. Ido nakebunio Ngesi kwap, abu kotiakun kotoma angajepa nuka akim nuapotu kodoikisi nginidiopet kangul, abu Edeke kotiakun toma otungaKe. Ido arai mam ijo idumunit ngin nae...Abala Petero ebe, "Erai kanukus, ka ikusidwe, ka ngul luelwaka."

111 Ipapero, siri ipupokinete aibe adio naka asioman naka ediini, kourunos irwan nakiareit. Ido kiwuruun ijo, Emoyo loejai tomakon erai atutubet naka Edeke, ido erai ekajenan loka nginikirot naka Edeke kwape "Abeit." Arai imameotor ijo ajenaanut naka nuiswamaikina ijo, arururkaros kwana neejai atuba, Akirot. Arururkaros neejai Ebaibuli, aikunyar awai kama ejaas iboro luitubusiaritai luka ediini luenyaritai ebe ikanisan, neejai atuba naka abeit, mama ejai Akirot naka Edeke neitejenunere Mesia.

Kede awokokwes kituluritete kwap, kelipa.

112 Edeke lominat, kesi ngun kere nuajeni eong alimun kotoma apak kana. Ijai isio alomar obaga, ileleba irotin ikiliok ka angor, isap ka apesur eremonoros, ijukanaros, kotamitos agwel ainakineta kanu ayangar neejai icetunganan yenebuni ainakini bobo kesi da koipone kangopekangol. Itunga luipu luenyaraikina ebe Ikristayon ejaas orotin egwelete isigalan, ajonio, kanuka ainakineta nuka ebaga. Edeke, esubit bala ejaas kesi acakakin ngin cut toma akonyeneKon, aisisianakin ikecedwe ibore yenimam erai abeit, asisianakin naka ediini nakapiirit naka Iromayon naka Nicholas Lokalaunan, aibe ace naepatanikit akwapin acamun, kosodi ainger Kristo elopet loka ebaga, Imerekek ilopet.

Edeke, elipit eong, atibong na, ebe kwape kituluritor isio akosikwes kwap neejai apua nabu ijo kolomuna isio,...Abu ijo kolo kolimokinite Aburaam, ekecokon lokapolon loarai enabi, ebe, "Kolot, Aburaam, kosodi aimar asinge naejai ariri naka angolol."

Kosodi ngesi ainyakun akirot, ebe, "Mam epedor aimar, mam eong apedori aimar."

Ido ibala Ijo ebe, "Kongolia kuju toma akuj, kosodi aimar aacer." Ido ajeni ngesi ebe mam epedor. Kosodi Ijo alimokin nges ebe, "Kwape kwangin ejaunor aurikon." Iseseni isio aisiraret neejai ekecokon loarai enabi, "anyoun kotoma apua naka akwap kiton aacer nukotoma akuj," ebe karaida ejai atwanare kotoma awatekosi kanu ayangar isio toma apua, ejai Aijar naepedori aitonyoun isio ayangar neejaas aacer.

113 Kwape ibu Ijo kolimokin enabi lokapolon Daniel, ebe, "Ido ngul luejenete Edekekec, kotoma apaarasia nukawasia, epote aswam nukaumokin. Ido ngul luibelokinete luipu mama ejai adolit epote aica adepar aacer ikar ka ikar."

Ejakait Edeke, Ekasuban Lokapolon, loakapakina abunore toma akwap kotoma ojautene loka Yesu, kanu ainakin etunganan ajenun nuarai Edeke. Ido arai ijo bon nges ipedori alemar aitisilaret naka adiakar, emamei Emalaika, amamei idiobore yenapedori aswam ngun. Arai Ijo nges ibwaikini atisilaret, ido arai Ijo bon nges ipedori alemar ngin awai ejok. Ido kwape kiraar ijo Emoyo, mam Ijo ipedori atwanare. Konye aponi kitaraun Ijo akuan tetere ijo ipedori atwanare; kosodi araun Imerekek tetere ilemari awai adiakar

naka IkelakunaKon, ebe ajai Ijo alakun kes kede Aokotokon Obe.

Oo, epol akirosit, Ejakait, ikalamit akwes nuka luipu. Aoomoom ebe: "Yawe, eperi kotoma atuba, ajai Nges ajar kwape ikoku. Yawe eurikinio toma awi. Yawe, erai atumunan. Yawe, isapat yenasiami. Ido Yawe, Lokapedor." Ibu Ijo oyanga aiboisio nu kere. "Kosodi do, Yawe, Imerekek. Yawe, Enabi." Ido ibu Ijo koraun ngun kere tetere Ijo itaci etiai loka adiakar, kosodi ainakin isio Aijar Namam Edaun.

114 Kitimoi isio, Wu Edeke, isio, lukican, isuban lumam ibusakinit luka akwap kana. Itidisiara isio atibong na, Ejakait, nakisiomio isio nuiswama Ijo kanukosi, ido iswama isio adis noi kanu atacakina. Eipone loabu Ijo kobunio kotoma apaarasia nuka ingarenok lukapolok luka ediini! Eipone loabu Ijo okapakinar aibwo ka aitodiar Akirot naka Papa! Eipone lomam Ijo icamanoror kanuikamunitos akiro nuisisianakinio! Ido lolo esubit bala ebe emamei itunganan yenekoto aibwo kosodi asalakin enyarit Akirot ebe "Akirot," kosodi mam acamanar. Ilipit isio, Edeke, kitimoi isio kanuka iboro kalu luipalunit isio noi. Kosodi ainakin isio atibong na, kotoma otauonokosi, kwape kiinakinor isio mamaKon kwape atuba. Ido ijeni isio ebe nginipak naecamunere Yesu Kristo Loibubukinitoi, ejaun aurio nakitetet, ejaun amerekek naeuruunio naitetet, ejaun Imalaikan awoere kotoma Akuj. Kanuka ikadiakanaran idiopet yenitoronokin, ewoete Imalaikan bobo.

Ilipit isio, Edeke, arai ejaas ice ne atibong na lumam ejenete Ijo kwape ainakinet alopet naka Edeke, kwape Eketajaranikec, mere bon kanuka aijen naka adam, konye kanuka aurio nakitetet (naka auruunio kede Emoyokon), kodomutu kesi Ngin kwape kwana, Ejakait, kede akosikwes kituluritete kwap. Ido arai ejai ice, Ejakait, yenimam iswamat nu, kodumutu ikecetauon aiyalama kwana, kosodete adumun bala kwape ikecokok lukolo, kotoma atuba naka itauonocek, Akirot, Mesia; naebuni aitodiar kamakec kwape Emoyo Lokalaunan, Ekecokon Lokapolon loka apak kana. Ilipi Kokiror loka Yesu.

115 Kwape kituluritor oni awokokwes kwap, ido amuno eong ebe elurete iwokotauon da, ijo-ijo ipedori, onaceka lominat, karaida irai ijo emeeba loka okanisa...Ido amuno eong ebe mam eong emusungit yes kanu alimun nualim eong. Eong...Emamei ationis ajaut okanisa, ibusakinit oni aswam ngun, konye, Wu onac, mam icamuni ngun, ibusakinit ijo aurio irwan nakiareit. Ngun kes abala Enabi Lokapolon loarai Enabi, "Ibusakinit ijo aurio irwan nakiareit." Abu Ngesi kolimok ngun neejaas luasiomitos akiro nuka ediini, "Ibusakinit yes aurio irwan nakiareit."

Ido kiwuruun ijo irwan nakiareit, mam erai ebe naarai iyuunit ijo. Ebalas ebe, "Iwuruunio ijo irwan nakiareit apak nakiyuunia ijo."

Konye abala Ebaibuli ebe, "Iyuunit ajokit da." Kwana, koany, mam erai ngun, erai ibore yeniswamaikin ijo.

Ibala ijo ebe, "Ijeni ijo, ajar eong ajar nakajokan."

Kwape kwangin ikiyakia da, konye mam kes awuruunitai irwan nakiareit kiton neadumuniata Emoyo Lokalaunan. Mam ber ngul ebelokina da kiton apak nadumuniata Emoyo Lokalaunan. Kiitunitos yesi akuar eroko abilakinio ebotet...arai abilakinio ebotet, naperoko abilakinio ebotet iswamauna? Abu Yesu kolimok Simon, "Kibelokin ijo kitogogong ikoninacan da." Ido abu Petero kutupite Nges adaun ikar iuni kede atutubet, ido kirengearite ajokin, kosodi aitangal lukadekak, alimonokit Eijiri, konye (kwape ejaar kotoma Akirot) mam ber ebelokina da.

116 Kwana, ijo ipuda eipone loka Ekiyakia kwape kangol kotoma otauon atibong na? Arai-arai abeit teni ipuda ijo Ngol...Mam nuebala icetunganan eyangaunete aitegelikinet, erai Ngin abeit, onac, inac. Ajeni eong ebe erai ngin abeit. Ijo ipedori, kwape elurio nginikou ido ogolokina nginikongu, mere mamaka, arai bon eong etunganan, onacekon, konye neejai Kristo nges ikeikini ijo akonikan, kotema, "Eyuunit eong Ngin. Ido epuda eong cut abeit Kristo ngol kotoma otauka, Kristo obe loka ebaga"? Ijo ikeuni akonikan kwana? Kisirereng Edeke ijo. Ejok. Kisirereng Edeke ijo, da. Kisirereng Edeke ijo. Ikatunga, akanin nginiboisit kere.

Kiswamaun ngin, onac; kiswamaun ngin, inac; kiswamaun ngin, opaperoka; kilelebunos kede Emoyo Loka Edeke. Aitegelikinet ani iswamauni nuelimuni idiotunganan kere? Kiitu, erai aijarakon. Aticepak mam oni ijaun toma akwap da tupuruc, imameotor oni atogogonget naka aiyatakin ajar adepar napekijaatar oni eyengane kotoma akumesiwok kwana. Aticepak mam oni ibuni apedori aiyengar eyenganece bobo, erai bon asianut naka Edeke. Ido ajokis anyoin iswamauni, mamace arai ijarit ijo ejok biai ka nu...? Abala Yesu ebe, "Arai mam itunganan ewuruunitai irwan nakiareit, mam elomar toma nepecepe."

117 Kwana, ajeni eong nueraas akiro nuemaanakitai aibatisao irwan nakiareit, konye asesenata ber oni nuapotu kiswamaunos kotoma Obaibuli nakewurunere ngul irwan nakiareit. Arai Petero ekeyuunan, araas ikiyakia ikeyuunak, konye mam kes awuruunitai irwan nakiareit kiton akaulo kedoiki kes Emoyo Lokalaunan ko Pentekosit. Kwana, aumokinitos kesi ibore yenabu iswamaun, kosodi Petero, kede luce kere kotemas atiar, "Yesi itunga luka Isirael, kojenuun na mamakus; Yesu loko Nasaret, etunganan loetogogong Edeke akidingotokus kede aanyuneta ka nukaumokin, nuabu Edeke iswama kamaKe; Ngol lokejenio sek, apotu

yesi kede atukos naetubi akiro oyangasi kede akanin nukaronok kosodete aibubukin, Nges etonyou Edeke ido irai isio ikajenakaKe. Abu Ngesi koyangau nu tetere yes ianyunete ka apupun kwana, ido erai kwape ejaar kotoma Nuiwadikaere."

Kosodi do, nakeirarriata nu, koditasi ikecetaun, kotemas atiar, "Ikiliok ka inacan, ekwaikisi ai tetere itajario?"

Kotema Petero kes atiar, "Kitoronokinos!"

118 Kwana, opaperoka lotulikat loiboie kane, neajenia eong iwongon arai ikany kayesi luiboiete kane. Abu eong ajai aimor nu kede esasedotikus, aticepak mam arai esasedotikus, konye ediopet kotoma osasedotin luka Atulik, ebala ebe, "Abu Yesu koinak ekanisa apedor naka asioni adiaakanareta, 'Idiotunganan yenitimete yesi akediaakanareta, itimio; yeniyenete yes akediaakanareta, eyenio'" Erai ngin abeit. Konye aanyutu ber oni eipone loabu ngesi kiswama, eipone loapotu ikiyakia kotupakiniata ainapetautike, mam erai koipone lo-loiswama esasedoti lolo.

Konye inyobo abu esasedoti losodit kiswama, arai ikoto ijo anyara nges kwangin, Petero, loajaatar ilaceta luka Akabakanut, eipone ali abalar ngesi ebe aswam ngin? Abala ebe, "Kitoronokinos, nginidiopet kayesi, kibatisaunos Kokiror loka Yesu Kristo kanu aisionio naka adiaakanaretakus, ido idumunete ainakinet naka Emoyo Lokalaunan. Naarai aisumunet erai kanukus, ka ikusidwe, ka ngul luelwaka, kere luenyarauni Ejakait Edekewok." Ido arai eroko Edeke enyaraunenei, ejautene ngopengol erai kanukon arai kitupak ijo acorakinet ngipengin. Arai iyuunit esipan lo Ngin, kede akusikwes itulurita, kotemas, "Amen." [Kotemari atukos ebe, "Amen."-Ekewa.] Aso, idiobore yenimam eriakasi kede Ngin itegelikina kede Akirot, ido mam erai kwape ejaar kama ejai Ekecokon.

119 Ejakait Yesu, ejaas kesi akaniniKon kwana. Elipi eong ebe nginitau loengaara atibong na loemameotor Kristo, Mesia (ido Kristo nges Akirot, Akirot nainyonyokinitai itodiario), ido arai ejai etau edio loengaara kane atibong na loemameotor Mesia ngol, Ainakinet Obe naka ebaga, Ainakinet adiopet bon nakabeit naejai, abu Edeke koinak akwap, kosodi aitodiar Ngin toma akwap kede ikecokok, luka Imerekek, Alucet naka adiakar, ido arai engaara etau ngol atibong na, kibwaik tomake, Ejakait, Mesia loerai Akirot lolo. Etingikini eong kes neijai Ijo Kokiror loka Yesu Kristo, Okokuke. Amen.

120 Ijo imina Nges? Ijo iyuunit Nges? "Omo ber Ajakanut naka Edeke, ka adoliteKe, iyatakinio luce kere."

Ipapero, eroko oni itwara, akoto eong alimun nu. Irwanapu, emisiikinitai eong erono noi. Kijaar eong Aisiraret kama ejai Edeke, ido ibusakinit eong aitejenar Aisiraret ngin komam apodo idiobore. Ajeni eong ebe emisiikinitai erono. Korai mam erai Ngin, akepolou mam do ti eraun Aisiraret naka Edeke; mam ti epedo araun. Ejai abunokin naepol noi lolo kanu Ngin amamus amisiikinitai. Eyuunit eong ebe ejaatar Edeke etunganan kotoma nginidiini ka erionget loka akwap, ido mam erai ebe asurwokinit eong ikanacan. Abunit eong ne Tucson, ikar iuni kau, ido abu ajaunos kede airiamun nepepe kayesi ijaanakinak kokuju kalaije kobuke Onac Gilmore, ido aponi ingitai, ebe, biai eong "abunit ne ageun ekanisa?"

Abu eong atema, "Mam, ipa. Abunit eong ne aingarakin yes." Konye mam ber eong engisitai, kotoma okar iuni. Konye koipone kangopekangol, ajai eong ne kanu aingarakin yes. Ajai eong ne aimorikikin akanin kayes, mere alomar oriongeta kede yes, konye aimorikikin akanin ka itauon kayesi kotoma Akirot naka Edeke, aitam alimonokin Eijiri neejai ngolitaun loewoliorit ka nginitunganan yenipuda yenejai kwap naka aruo naka iwokoporotoi.

Ainakini eong akaijar neejai Edeke atibong na, kede ekatau kere, kede kere nuejaas tomaka. Amameotor eong nuipu nuebeit ainakin; mam eong apedori ayangaun lusupurununo, luesaete, ka esabu, naarai amameotor eong edio. Konye kere nuajaatar eong kotomaka nuabu Edeke koinak eong, aijar na, etitingikini eong mamaKe bobo atibong na, kotoma atuba naka Akirotoke kotoma otauka; ido esumunikini eong Nges aibwo kede Akirot ngin, arai kacamak Ngesi eong aijar ecekaru, araut lomunot kwape kapedoria eong kere; alimonokin nginitutubet naka Ngin, ido eyuunit eong nginitutubet naka Ngin; aso, kingarakinai eong, Edeke. Yesi iswamaete ibore ngipengin keong?

121 Kijaunai isio, Ejakait. Ijauni isio Ainakinetekon naka ebaga, Mesia, Akirot nainyonyoikinitai naitodiarit Ajakutukon kasio, Ejakait, komam ipodo etal arai ediini. Kianyuni isio, isio ikulepek lolo, akwap ejai amunaar, ido ejai ne Mesia lokapolon ebwoi kongaarite Akekanin: Yesu Kristo ngopengol bian, lolo, ka ikar kere, loabu koinak aisumuneta, ebe kotoma apaarasia nukawasia, ebuni ekanisa araut erionget noi kiton neebongoria alomar toma Laodikia. Ido iseseni isio ngin lolo, Ejakait.

Inyobo ipedori isio aswam, Edeke lominat? Inyobo apedori eong aswam? Ingarakinai eong ka ikecokok lu ice, Ejakait, airimor akwap, ikecokok luka Akirot, alimonokin Ngin, Ejakait okar kalo loebunit. Ingarakinai isio, Ejakait, ilipit isio. Koinakinai isio luka Aminakon ka Emoyokon ka Aicakon. Ititingikini isio aijarakosi atibong na neejai Akirotokon ka anyaraunioKon. Kokiror loka Yesu Kristo, ijauni isio Ainakinetekon: Akirot naka Edeke eraun akuan kotomakosi. Amen.

122 Amina eong ikososiso luka ekanisa. Abala Paul, kotoma Obaibuli ebe, "Neawoio eong, abu awoi kotoma

Omoyo. Alimonok eong, alimonokini eong kotoma Omoyo. Nea..Idiobore yeneswamai eong, eswamai eong ngun kere Kokiror loka Yesu Kristo." Kwana, kwape eraar ebe arai Na naninik noi mamakus..Ido esiyalamikit eong yes. Abunit eong kede Aisiraret. Ecesawa esubit bala angara eong alimun Ngin, konye kereka ikamunitos erai ekapelu, inacan. Arai mam eong eswamai ngin, arai do eong loka esoswai. Arai mam eong eswamai ngin, arai eong ekabilakinan ebobet neejaas akaomisio, ka akaiyuun toma Akirot naka Edeke. Ibusakinit eong aswam ngin, mere kanu araut loetegelikina, konye kanu araut lomunot neejai anyaraunioka. Ido akoto eong aingarakin yesi kere, akoto eong aswam idiobore kere yenapedori eong aswam.

Kwana awooto ber oni ediopet kotoma okososio lukapolok loka apaarasia kere, amina eong ngol ejok noi, Amina Eong Nges. Ijeni ijo, eyuunit eong ebe korai ti oni kere aminas Nges, ti oni kiswama nuilipit Ngesi oni aswam. "Eipone ali kinyarata yesi Eong, 'Ejakait,' kosodete mam aswam nualimokit Eong yes aswam?"

123 Biai ijo ipupokini kereka ikecokok luetacio luetemarete ebe "iwadikak ekonikiror oitabo, kosodi alomar; kosodi ainyam emugati lo, kolim nu, ido ojokuuni" kobala Ekecokon Lokapolon Elopel ebe, "arai mam itunganan euritai irwan nakiareit mam epedori aanyun Akabakanut naka Akuj"?

Ido koany ber ijo itunga ngul luetutuoritai luasiomitos akiro nuka ediini luka apak kangin, luetutuoritai! Lukalaunak? Luajarete ajar nakalaunan? Emamei ibore yenebeitor oni atiriana ngin lolo, eipone loajariata ngul. Ido inyobo abu Ekecokon Lokapolon konyara kes? Abala ebe, "Iraas yesi luka Satan papakus," naarai mam ngul apotu...Amisiikinitos kesi Akirot konye Akirot naka apak ace, mere Akirot naka apak kangin.

Arai apotu ngul komisiikisi kotoma apak naka Noa, edolit ngin, arai ngin apak naka Noa; konye mam ngin apedori aswam kotoma apak naka Musa. Ido apak naka Musa mam apedori aswam kotoma apak naka Yesu. Ianyu? Apak naka Luther mam epedori aswam kotoma apak naka Wesley. Ido apak naka Wesley mam epedori aswam kapak nako Pentekosit. Ido eswama Pentekosit ibore ngipengin yenapotu luce kere ngul kiswamata. Kwana, ingai ainanakini eong aigange kotoma apaarasia nuatuboros? Engisit eong yes.

124 Kelomu anyait, inyobo ngin? Inyobo...Kelomu anyait naka akimait. Abala Yesu ebe, "Arai mam ikinyomit yenika akimait edoi toma alupok." Inyobo iswamaun kedo ikinyomit yenika akimait...arai kedo ikinyomit yenika akimait alupok? Ibore yenisodit yenegei alomun nges anyait. Mam eputosi kede ikinyomit yenabu odo toma. Kosesen esube. Mam eputosi kede ikinyomit yenabu koloma toma, konye nges edakit Ajar naka akimait. Inyobo abu kobu...

Ekapiirit ngol loabu iwadik eitabo ngol loejenara, ebe, Edeke Loililingi, abala ebe, "Eipone ali epedori Edeke ajaut loangaari Angolol Nakarengan, kosodi aibwo kotoma okar elukumit luka amuton kosodi asesen idwe ludidik enyamete ingatunyo, ka itunga ikajanakinio omusalaban, ka ayario kotoma aiboisio nueyarere itunga ka iboro, ido mam Nges apukor Akeituk da?" Itei ijo, Akirot erai apukokinio.

125 Akimait ngin, neageunia ikinyomit ngin yenikabeit kageunet, abu itukurwo Edeke. Ido awasia kobuni Akimait, aitodiaret obe naka Edeke, naetodiarit Akirot kere kiton ebe arai Ngesi Akirot. Kosodi Edeke ainakin Nges Ateran ko Pentekosit; Konye abu Ateran odo kwap kotoma aturio nuka amuton, kwape bala akimait alopet iswama, abu odo toma. Ido inyobo ainakini ngin mam iswamai? Naarai ebwaa kokwap naka alupok, ajai ngin aibos eroko itolomuna ajar.

Konye kobuni esasedoti ediopet apak adiopet, kokiror loka Martin Luther, kosodi ngol aitolomun Akirot adiopet naka Abeit: "Ejari ikadoliton kanuka aiyuun," kolomuni kanen anyait; kotupakini anyait ace ngin, Zwingli, kosodi do kobuni Calvin ka Knox kolosi ngaren.

Ibore yenisodit yenijeni ijo, abu kijulak akenyait, abu koloma toma aliliget. Kwana, aputosi ngin mot bala ngin, konye aroko mam arai ibore ilopet yenabu koloma alupok, kanen kobuni Wesley. Kotoma Wesley kolomuni ekanisa loka Methodist, kotoma okanisa loka Methodist kolomuni ekanisa loka Nazarene, United Brethren (Inacan Luimorikikina), kaiceda. Inyobo abu ngin kiswama? Abu igwegweun kau kosodi aitolomun, ibore yenasubit bala ikinyomit ilopet yenika akimait kwana, Pentekosit.

126 Kwana, kosesen Yesu, kotoma Matayo 24:24, " Kotoma apak nakawasia, epote imoyon ngul iarei aputonoro noi kiton ti aitapaar Luseuna da, korai opedoros." Kwana, elomuni ikinyomit yenika akimait, idiotunganan yenekorie akima ejeni ebe elai ngin ejok noi, ikinyomit yenika akimait. Konye kiboikin ijo kwape kosodi aibwaikin ngin akanikon, kosodi apukor. Emamei akimait kotoma, erai abokoyat. Konye kau cut kau ngina, kokwap naka acuuma nainwaki kianyuni ijo icokat yenididi noi, ngin nges ikinyomit. Ido inyobo do ebeit abukoyat aswam? Erai kanu ayuarit ikinyomit, epedori akolong naemwana aiyar ikinyomit, eyuarit ngin ikinyomit kiton naketionio. Ido ketiono ikinyomit, kolemar abokoyat kamake. Konye, ijo ibu komisiik, ikinyomit ngin yenelomuni, ebeit oputosi kede ikinyomit yenabu koloma alupok.

127 Akaulo naka aisikwarunio naka Luther, kolomuni erionget. Akaulo naka aisikwarunio naka Wesley,

kolomuni erionget. Akaulo naka Alexander Smith, John...Alexander Cambell, John Smith, kere luce ngul, kolomuni erionget. Akaulo nako Pentekosit, cut kobuni kwap bala ibore ilopet, konye abu erionget kolom. Inyobo abu ngin kiswama? Abu kolemar awai.

Kijaun oni ikar itomon ka lukany luka aiskwarunio, mam ejenunitere kotoma akiro nukolo kere. Ido koany, kotoma okar kalu luka aisikwarunio, abu kiriam akwap kere, ido emamei erionget karaida ediopet loedukunitai kotomaKe. Aibo ajai Ngin? (Abu kitegea adou loekaukau, abu kotwanik kotoma... kanepakanen, abu kotwana.) Emameun erionget loatupaki Na. Inyobo? Erai ikinyomit ilopet, mam ejaun bobo ece. Ido ejai kwana abokoyat alemar awai, emamei acamanar, emamei itunganan yenekoto ijo. Inyobo eraar kwangin? Ebeit korai Ngin.

128 Inyobo ainakini ekanisa esipokin ngina? Kanu aigang Ngin. Aibo...Ingaibo ti ecamu? Biai luko Baptist, arai Presbyterian, arai Lutheran ti kereka igangata alimonokinio naka aitangal naka Edeke? Kwana elomu Abeit, inyobo eswamaun? Mere abokoyat; konye elomuni Aijar kinga kotoma abokoyat, kolomari toma okinyomit, Aijar obe nakabeit. Erionget loebwoi kane, etwani, kwape abu kiswama kotoma nginitur, iswamai ibore ngipegin. Ibu ijo kolom kotoma ngul, ikar itomon ka lukany kau, kosodete abongor cut bobo tomake! Konye Aijar alopet etupaari ikinyomit, ijai oni apak nakawasia, inacan.

129 Inyobo ainakini ngin elemar awai? Tetere eyangauni ikinyomit toma akonyen nuka Okoku, kanu aitioton ikinyomit adolokin ationore naajokan noi kanuka Lokapolon. Inyobo ainaki ngin elemar awai? Aso, eyangauni ariebo naka etau, akiyo, ebe mam kes eperete kokwap naka a-k-o-l-o-n-g, kidimarai Okoku, kanu aitiotonio toma Oijiri loileleba, kanu aitodiar nginibore kere yenabu Yesu Kristo kisumunikite kotoma Obaibuli. Ejai Akuan atakanun kakidingos naka itunga. Ido mam ebuni ajaun bobo erionget ece, elomari cut toma kiton Laodikia. Inyobo akerianaror erionget kede? Imilionin luka dolas, ka imilionin luka itauon.

Ido inyobo ainakini Ekecokon abuni? Kanu alakun inacanaKe kotoma obulesene. Mam eong-eong ajeni; kojai Edeke kaoni, kingarak oni. Kisisiata Akirot! Kingicata Nuiwadikaere! Tomakec iwomitos yesi ebe ijaatar Aijar Namam Edaun, ido Ngul kes itejenunitos Abeit. Itei ijo, abu Edeke kotiakak Akekiro neejai nginitur. Atur na duc...

130 Inyobo abala Yesu nakebunio? Abu kolimok itunga ngul, ebe, "Yesi luka esoswai! Yesi arwatatin nuiladatai, ido idukete atesin nuka inabin, ido lukapapakus ebwaikinete ngul toma nen. Iraas yesi odwe luka papakus. Ido aswamasio nuapotu kwi kiswamata, iswamaete yesi da." Mam esalakini ikoni nepenen, ikanacan.

Konye kebu Yesu acepaaran, Ekecokon Lokapolon loka amerekekin anyoun ko Pentekosit kama ejai Luther anatar aturio kere, nuacamutu Aica kwape abunio Ngin kotoma luadakit (mere acamun loadakit, acamun Aica; itei ijo, kolosi kinga), Ebuni Ngesi alakun. Eyalama eong noi ebe ajeni eong ebe abonguni Ngesi bobo. Oo, ijo ibuni aimarakinio kede atukosiKe? Ijo imarakinio? Ejai eipone adiopet bon loka aswam ngun, mere kanukan alomar okanisa, konye koipone loka aurikinio tomaKe irwan nakiareit. "Ido kere luainaki Eong Papa, epote mamaKa, ido emamei itunganan yenebuni, kidimikito enyarau Papaka nges." Itei ijo, kesi ngun kere nuejaas kanuka ngin, acamun Ngin. Nges...Ngin bon nges Ainakinet naka ebaga najeni eong, nges Ainakinet naka Edeke nabu Ngesi koinak akwap, Okoku loteluna. Ido Ngesi ngopengol bian, lolo, ka ikar kere, Akirot. Ianyu? Kiyu Nges kotoma apak kana, aileleba naka Ebaibuli.

131 Neapotu iboro ngul lukaiyeiyea...Kokau kotoma Aturio ngun Akanyaareai nuka Ekanisa, ajaas iboro ikanyaareai luengadad luaraas luka aiyeiyea. Ajai eong aiwadik eitabo loka Ngin. Ido abu etunganan lokapolon loasiomit akiro nuka ediini alimok eong pac, ebe, "Onac Branham..."Koany ber ijo eipone loetamia Satan ariar ijo awai naka erot? Ebala ebe, "Onac Branham, ijeni ijo inyo? Eyuunit eong ebe ebuni Ejakait apukokin ijo nuilosoni atupakin aswam. Biai erai...Ebauni araut aiyeiyea nakapolon naibwaa kotoma kokwap naka Aipuceta kanu Akanyaareai."

Abu eong atema atiar, "Mam, mam erai kwangin, onac."

Ebala ebe, "Ebuni araun ibore yenimam ber iwadikatai toma Akirot da."

Abu eong atema, "Mam! Mam! Kimurwokit ijo ebe, "Yeniyatakini akirot adiopet, arai alemar Akirot adiopet awai." Itei ijo, edaunit Ngin ajaut toma ngina sek, konye akurwoki ikesikwarunak aanyun Ngin, mam apotu kojarata aojau kiton aanyun Ngin.

Ido angetakinis aturio kwana, ijai oni ne cut Laodikia. Ido kiitu, atur nako Laodikia, ajai Ngesi kinga naka ekanisa, ikungukungi, kotamite abongun toma: abu Kebu kirengearite Adamuke kinga. Kingarak oni Edeke. Aanyutu ican kokinga naka irutei kede Nges. Alototo mamaKe kotoma atwanareKe, kotoma anukioKe, ka kotoma ajaruniKe; naarai erai ngesi ngopengol bian, lolo, ka ikar kere.

132 Ayeikisi ekosio ediopet eroko oni anyounia. Biai iyeikinite yesi? Amina Eong Nges. Ipedori ijo ainakin isio eporoto loka acuma, inac? Imwaasi ai ejenete ekosio ngol lomojong? Eong...Arai ijaunar ijo toma airiamununeta, amina eong ngol.

Kwana agolokisi awokokonye, koomoom nuikamunitos Yawe. Amamei yenebusakinit, amamei yenapedori aswam ngun kilema Nges. Kosodi Ngesi abunore kwape, kosodi araun ikoku yenididi. Abu kobu, atumunan. Abu koraun ekeon abao, atunganan loeswamai. Abu koraun Imerekek, abu koraun asubanit. Abu konyou kaipikor, Yawe. Kosodi Musa alemar akekan kama ejai atorobuke kokuju naka etauke, abu Edeke kolema Akekan kotoma atorobuKe (Aiyeyeyeake) Okokuke loaponi inomai kede adek naka adiakar, namam imukia; kosodi ainyakakin Ngin toma atorob bobo, kosodi airiun ngaren kosodi arior Ngin neejai ijo keong: "Yesu Kristo ngesi ngopengol bian, lolo, ka ikar kere."s

Kosesen Nges kwana.

Amina eong Nges, Amina eong Nges
Naarai abu ageu amin eong
Kosodi aitac akaitajario
Kokitoi lo Okalvari.

133 Imwaas ai ezenete ebe akoto korai ekecokon, kotema "Amen." [Kotemari atukos ebe, "Amen."-Ekewa.] Ibusakinit! "Inyobo ainakini erai ekecokon? Ajai araut. Kwape kiwoio ekokoro lopelo bobo, korio akonikan epuwai loemesa. Ejaas luka Methodist, Baptist, Lutheran, Presbyterian, Atulik, ka kere, iboiete kotoma kane atibong na. Kiyogaikinos, kobalas ebe, "Ekaloton loupaka, eyalama eong noi ajaut ne kajo, atibong." Icebore mam ejaas kesi. Kotema, "Kisirereng Edeke ijo," kwape kiyoganakinor oni idiopet kayenice kwana. Kwape kiwoio oni ngol bobo kwana.

Eong..

[Aiboisit naemamei ibore katepu-Ekewa.]

...akaitajario
Kokitoi lo Kalvari

Kwana agolokisi awokokonye kasodete aikeun awokokanin, kosodete ayeikin Nges.

Amina eong Nges, Amina eong Nges
Naarai abu ageu amin eong
Kosodi aitac akaitajario
Kokitoi lo Okalvari.

134 Ido kwana, Edeke loemameotor akuan. Aso, ketulurwoto awokokwes kasodete aiwumuumo ngol kwana, kwape bala idwe ludidik, iraa yesi idwe luka Edeke. Mam iseseni nuepedori akwap aomit, ijai ijo aima kwana, aima Kristo. Kitulurwoto akusikwes kosodi aiwumuumo ngol. [Kiwumuumokinos Onac Branham kede atukos ebe Amina Eong Nges-Ekewa.]

Biai mam ijo ipupi bala ilongaritai? Bon...Abu icebore iputa abunonokin ka akwapin kere awai kamakon? Ijo ipupi kwangin? Ikeutu akusikanin kuju, "Apupi eong elotar kere kinga. Apupi eong aitegelikinet. Apupi eong bala ajai eong ainyam kotoma akaniniKe. Kijaar eong..."Kwape abu onac koinakina ajenaanut kane, "Inyamat, Inyamat luka Ekecokok, inyamat luka amerekekin." Nges Akivot.

135 Amerekekin nuka Edeke enyamete inyamataKe, "Mam etunganan ejari kanuka atap bon, konye kanuka nginikirot naelomuni akituk naka Edeke." Ido Ngin nges na, Ebaibuli. Inyami oni nginikirot, mere ace kotoma Akivo, konye nginikirot, naelomuni. Oo, mam ngin einakini ijo aminun Nges? Aomoom ebe kwana kijaar oni Aijar Namam Edaun! Mere ebe ibuni oni, kwana irai oni odwe luka Edeke. Mere ebe ibuni oni araun, kwana! Ido iboie kere nepepe kotoma aiboisio nukotoma Akuj kotoma Kristo Yesu. Ido etelevison lokapolon, itodiarit ebe ejai ibore yeneinakin itunga (itunganan yenelosi airimor akwap) yenejeni alabiro naka etelevison. Akivot naka Edeke, ka Emoyo loka Edeke ayangar Akivot naka Edeke, itodiari Yesu Kristo kotoma aiboisio nukotoma akuj mama ejaas amerekekinKe, ebe Ngesi ngopengol bian, lolo, ka ikar kere. Mam kereka ngin eumokina? Eumokina! Kisirereng Edeke yes.

136 Kwana abwoata ber oni ipak edit. Ijo ijaatar itunganan ice yenipuda ailipakinio? Kwana, kiitu, kotoma apak naka abaga, oma Ejakait Yesu. Oma Nges kotoma apedor naka ajaruniKe. Ido arai apedori eong adumun asianut kamakon (ijo, ekonicokon, ekanisakon, arai idiobore), mam akuar emutonor, mam edou etepi noi.

Akuar kaya (ejai aberu naebwoi kane) apol eong aswam noi, abu kayanga itunganan yenadekan ka iboro kiton...Ajai aberu naka ikar akaisakanykauni ka icebore lukapolou nabu akekou amunaar, ido ajaatar ngesi...abu koomoomoi nuka adumun ikoku arai icebore, abu akekou omunaar. Kosodii Billy, koyapeesi, anyaraar eong, ebala, "Papa, ipedori ijo?"

Eong ebe, "Mam eong apedori kwape kwana. Ejaas itunga...mam eong apedori aswam ngun."

Ebala ebe, "[Papa, ijo ipedori alomar toma ailip? Abuni eong alimokin kes ebe ijai ijo ailip.]"

Abu eong atema ebe, "Eebo." Ido kotoma apak ngipengin abu kobu ngesi alopet. Abu ojotoor, abu okweny kotoma ojauteneke lokajokan; Ajai itunganan ne ebwoi kane einakini ajenaanut kanuka ngin idakikan idis kau.

137 Onac Mack, aanyunit eong nges kane ipak edit kau, kanenice kokanisa. Ejai ngesi ne, ediopet kotoma ocokok, ecokon loka ore kane. Onac lominat noi, ido amin duc eong Onac Mack anyoun neageuna eong kotoma aijaanakin. Kasodi eong airiamun kanges...

Ido ajai eong kuju ngina British Columbia; ido kanu aitodikin yes eipone loepedoria Edeke aitemokin nginibore kere ibecokina. Adaunit eong adokar asigiria, ido ajai abongor toma amodingot neabu eong engarenikitor atukos kere naka itunga luko India mama ejai Edeke; ido apotu kesi kere kibelokinos, kosodete adumun Yesu.

Ido kanuka adwaranut nabu kolimok esapat loka India loabu akesigiria kowoliorite, ikar iarei kau, abu kolimok nges neapedori adumakin ngin, alwanis anyoin abuni ajaun awai, ka aiboisit naebuni asigiria abwoio. Kojai totoke atwanare kotoma adek naka eremone loka etau. Aponi nges kitangaleunei ka aitajar. Kosodi isapat yen, abunore kosodi aanyun ngin, ido kojoni ebe...aponi kodumunai akesigiria cut becebec koipone kalo alimokinitere nges, ka nginibore kere.

138 Mam Akirot naka Edeke adiopet da naineritere...Abuni eong aingit idio kotomakus, "Biai Ngesi...ijo ipupunitor Nges elimuni idiobore, yenelimokinitor Ngesi eong alimokin yes, komam itodolikin cut becebec?" Arai erai ngin abeit, kotema "Amen." [Kotemari atukos ebe, "Amen."-Ekewa.] Ianyu? Ianyu? Cut becebec, mam Ngini ibiroror apak adiopet da.

Ido ajai Onac Mack eperi kotoma adoketait naka atwanare, kosodi ajaun ebe abu akeberu kinomak Billy esimu...aberu naka okokuka, kosodi alimokin...aingit neabu eong ajai; amucalat ngin naminat kosodi...akeberu. Kosodi ngin...Kosodi aberu naka okokuka atemar, "Ejai ngina agolitome nako British Columbia osapaali loka amej."

Ido atupuruc ngin, koiponece, mam eong apedori aitekerear asigiria ngin kinga. Kosodi Billy atemar, "Acamunit eong abuni eong ainom esimu ore irwanatipet bobo." Kosodi ngesi alosit aiboisit nainomere kosodi ainomar. Ido kangina apotu kobongutu ekerete, neabwoio isapat ngin yeniko India kangina, yen...ngol loaajaatar asigiria, kosodi atemar, "Ejai Onac Mack eperi adoketait naka atwanare, ido iworot ijo."

139 Kasodi eong anyoun, alosit toma amagoro kasodi akukokin kwap. Eong ebe, "Edeke lominat, kangina, amairon ilukumin iuni anyoun akwap kana, kotoma aiboisit naecaia akolong nako Arizona, ko Tucson, ejai onaceka, ido eperi ngesi kotoma adoketait naka atwanare. Ijo ingarakini nges?"

Abu icebore kenerakinos keong, "Ejokuka kere."

Ido neadolunio eong neejai Onac Mack kapaaran kaya, ainerakin kanges, abu eong engit nges ebe, "Osawa ali abu ngin kiswamaunor?" Arai cut becebec esawa ngopengol loilomaria toma ailip.

Oo, Nges...Mam kereka Nges eumokina! Ngesi ngopengol bian, lolo, ka ikar kere. Eyalama eong noi ajenun ebe ajari eong kotoma Akonyen nuka Ekabaka.]

140 Ketulurwoto awokokwes kwana, ido ejai onac ne loketiai, onac loerai ekalimonokinan, opaperoka, emeeba loka Assemblies of God, onac loketiai kane. Anyarit eong nges, ebe, "Creechy." Abu iner iboro luajokuka noi. Onac Creech, anyarit eong ijo kwangin. Mam eong ajeni nuibeit alimun, irai ijo onaceka ido ebulesit loka oupaka kotoma ocan luka Yesu Kristo kotoma apak kana nakawasia. Kisirereng Edeke ijo. Ido aomit eong abala Onac Tony ebe abeit ijo aitwar esipan kotoma apak kana, kwape kitulurwo oni awokokwes. Eebo, kobua.



www.messagehub.info

Nuelimonokinit

William Marrion Branham

"... toma apaarasia nuka eporoto..." Apuk. 10:7